

BUNZAMBI ME TENDUKA

 Matondo na nge, Mpangi Carlson. Mpe mbote na beno nionso bampangi-babakala mpe bampangi-bakento yina ke sadilaka Mfumu. Ya kele...Na bantangu yankaka mu ke vwandaka na mwa keti-keti na kumata awa, ntangu mu ke kuwaka bimbangi ya mbote mutindu yayi, mpe nionso yina, mutindu mu me sala yawu na suka yayi. Mpe dyaka, mwisi-ntoto na kati ya mpasi mpe yina ke na kutalaka mpasi, mutindu kisika mpangi ya beto ya bakala mpe ya kento ya Baptiste me lutila yawu; mutindu mu vwandaka Baptiste, munu mosi, Missionnaire ya Baptiste, mpe—mpe mu zaba yinki ya zola kutuba ntangu bampangi ya beno...

² Diambu yango me kuminaka munu. Bampangi ya munu mosi losaka munu na nganda, mpe bawu bakaka dibanza ya kubasisa munu na nganda samu ti mu kumaka kilawu. Mpe mu bakulaka ti, mpe mu ke tubaka yawu na nzonzolo mosi ya kubumbana, “Kana mu kele kilawu, beno bika munu swi, samu mu kele na kiese mingi mutindu yayi kulutila mutindu yintu ya munu vwandaka sala mbote.” Na yawu yina kele mwa philosophie ya munu, ya munu mosi. Mpe—mpe kieleka mu ke sepelaka ntangu yayi—yayi na yina mu me kumaka mutindu yayi.

³ Mpe mpangi ya beto ya bakala ya Dibuundu ya Klisto yayi awa, mutindu beto ke bokilaka yawu, to ya Campbellite. Mpe mu ke bambuka moyo ti bawu vwandaka nwanisa balukutakanu na ngolo nionso ntangu beto bandaka. Kasi, beno zaba, na ntangu mosi beto vwandaka na mosi na nkumbu ya Paul yina vwandaka mutindu mosi, mpe yandi kumaka mosi ya beto. Na yawu, ya kele kieleka. Mu banza ti yina ba ke sosaka ntangu nionso kele luzingu yina beno ke na kuzinga. Beno zaba, ya kele ya kulutila mbote ti nge kuzingila munu dilongi na kisika ya kulonga munu yawu, ntangu nionso. Mu ke...

⁴ Mwa ntangu fioti me luta, longi mosi ya nene, bakala mosi ya mbote ya Nsangu ya mbote ya muvimba, beno nionso—nionso kuzaba yandi, mu banza, ya kele Reverend Booth-Clibborn, yandi ke longaka Nsangu ya mbote na bandinga sambwadi. Yandi ke na mayele mingi. Mpe munu... Yandi kele muntu ya dibanza ya nene. Mpe kilumbu mosi beto salaka nzietelo kintwadi, na yandi mpe Mpangi Moore na munu, mpe beto vwandaka zonzila diambu mosi. Mpe dibanza ya munu vwandaka ya kuswaswana na yina ya yandi, mpe yandi balukaka samu na kutala munu. Yandi tubaka, “Nge zaba Biblia ya nge ve.” Beno zaba mutindu Mpangi Booth lenda tuba yawu.

⁵ Mu tubaka, “Ya kieleka, Mpangi Booth, kasi mu zaba mbote Nsoniki.” Na yawu, na yawu mu—mu zola... Beno zaba, ya kele

ve kuzaba Ndinga ya Yandi yina kele Luzingu, kasi, “kuzaba Yandi kele Luzingu.” Ya kele kieleka. Beno me mona? Ata ti mu zaba Ndinga ya Yandi to ve; kasi kaka mu zaba Yandi! Mpe yina kieleka kele Kieleka.

⁶ Mu vwandaka pesa mbote, na suka yayi, na kimvuka yayi ya kitoko awa, ya balongi. Mpe muntu yina vwandaka kuna ya vwandaka . . . Mu zola kukumisa muntu mosi ve. Kasi bakala yayi ya ndombe kukotaka, mpangi-bakala yayi, vwandaka kuna. Mu tubaka na secrétaire ya munu awa ti, “Yina kele Muklisto ya kieleka.”

⁷ Nge ke bambukisa munu moyo mingi na Mbuta Smith yina vwandaka ya Dibuundu ya Nzambi kati na Klisto, mu banza. Mu vwandaka longa bawu mingi kuna, mpe—mpe mu lenda mona yandi diaka. Yandi fwananaka mingi na mpangi-bakala yayi awa, kaka ti yandi vwandaka na mutindu ya mandefo ya mpembe. Mu vwandaka kota na kielo ya manima, mpe mu ke zimbanaka ata fioti ve nzonzolo ya kiboba yango mutindu yandi vwandaka kutuba; na kutalaka na zulu, mpe basantu nionso vwandaka yimbila, beno zaba, mpe ya vwandaka na mwa mwana-kento mosi ya ntwenia, vwandaka, yina vwandaka kuna na nsongi. Mukunga mu vwandaka zola mingi vwandaka *Kukumisa Yandi*. Bawu nionso vwandaka bula maboko, na mutindu ya bantu ya Pantecote, beno zaba, *Kukumisa Yandi*. Bawu vwandaka zola munu, mpe munu vwandaka zola bawu. Mpe ntangu beto vwandaka kota kuna (Yandi vwandaka vwanda kuna, ya vwandaka tula yintu ya yandi mutindu *yayi*, na zulu ya mesa, mpe ya vwandaka tala bawu kaka, beno zaba.) yandi tubaka, “Kota, kuluntu. Beno pemisa yimpu ya beno.” Ve, “Pemisa yimpu ya nge.” “Beno pemisa yimbu ya beno.”

⁸ Mpangi-bakala yayi awa; mpe mu me kuwa, na yawu, ti mosi ya bayimbi-mikunga ya Nzambi yina mu ke zolaka mingi kele kento ya yandi. Mpe mu me sala nionso yina mu lenda sala, samu yandi yimba. Mpe, na yawu, yandi lombaka ti ba bokila yandi ve, mpe mu zaba yina ya zola tuba. Kasi munu mosi ke bokila yandi, kana yandi zola, yandi kwisa samu na kuyimba.

⁹ Mbote, nge kele ve mpangi-kento yina yimbaka—yimbaka yayi, *Kuna Na Masuwa*, kilumbu mosi na suka na Bantu ya Mumbongo ya Baklisto, mutindu yina ve? [Mpangi-kento me tuba, “Yinga, tata. Yinga.”—Mu.] Mu banza ti kento ya munu ke kwisa na sabala yina ke kwisa, mpe mu zola ti yandi kuwa nge, samu ti mu me kumisa nge mingi. Mpe kana beno me kondwa yawu na bande, beto ke yidika diambu yango. Mu ke zolaka mikunga yina ya kitoko.

¹⁰ Mpe, mu ke tubaka na bantu, mu—mu lendaka kuyimba ata fioti ve. Oh, la la, mu vwandaka ntama mingi na yawu. Kasi mu tubaka, “Kana nge me kuma na Zulu mpe ti nge kuzinga na yinzo ya nge ya nene, nge zaba, na zulu Kuna,” mu tubaka, “ntama

kuna na nsi ya mongo, kuna na kati ya mfinda, mwa yinzo mosi kele kuna. Yina ke vwanda ya munu. Mpe kilumbu mosi na suka ntangu nge ke basika na velanda mpe nge ke kuwa muntu me telema kuna, ke na kuyimba, ‘Lemvo ya ngitukulu! ya ke wakana mbote, yina me vulusa muntu ya mawa mutindu munu!’ Nge ke tuba, ‘Lukumu na Nzambi! Kiboba yayi Mpangi Branham me sala yawu.’” Ya ke vwanda munu beno ke kuwa kuna, ke meka na kuyimba.

¹¹ Na bampangi ya munu ya Baklisto, mpe na . . . Mu banza ti mpangi-bakala mosi talisaka yandi na beto, na suka yayi, ti ya kele longi ya Buddha, awa. Mbote na nge, nkundi ya munu ya ntalu. Mpe mu ke solulaka mingi, kasi mingi-mingi ve, kasi na bantu ya Buddha; mpe mingi-mingi na Canada, na kati ya ba-Chinois, mpe mu monaka ti ba kele bantu ya luzolo mpe ya mbote.

¹² Mu ke bambuka bakala mosi ya Buddha ya ntwenia ya tempelo Buddha, yina kwisaka na lukutakanu ya Winnipeg, mpe yandi vwandaka mpofo. Bawu kele bantu ya nzutu ya fioti, bantu ya mbote, mpe ba ke kwikilaka ti Nzambi kele munganga. Mpe ntangu mu vwandaka sambila samu na yandi, mpe yandi vwandaka vutukila bambala mingi, mutindu yandi ke zolaka Nzambi, mpe na mbala mosi meso ya yandi zibukaka, na . . . Mpe ya vwandaka kima mosi ya kitoko. Na yawu, beto—beto ke sepelaka na muntu mpe bantu nionso.

¹³ Ntangu yayi, mu me kuzwaka ntete ve ntangu ya mbote ya mutindu yayi, na Chicago, samu na kumeka na kutuba . . . Na yina, mu lenda ve kumeka kulonga bansangu yankaka, samu balongi yayi kele awa ke na kiyeka kulutila munu, samu na kulonga nsangu. Kasi, na manima ya nionso, beno kele awa ve samu na kuwa nsangu. Kasi mu banzaka ti ya ke vwanda ntangu ya kulutila mbote yina mu lendaka kutana na balongi ya Chicago, ya kizunga yayi awa, mpe samu mu zaba bawu mbote, mpe samu beto zabana mbote. Mpe ya kieleka mu ke vutula matondo na Mfumu samu na ntangu yayi ya mbote. Samu, mu me kwisaka mbala mingi na mbanza yayi awa, dibuundu mosi kaka simbisaka munu, mpe Bantu ya Mumbongo ya Baklisto simbaka munu; yawu yina, mu kuzwaka ntangu ya mbote ve samu na kutuba na kimvuka ya bampangi.

¹⁴ Mpe—mpe na yawu mu banzaka, mpe ya ke na mambu mingi ke landaka ministere ya mutindu yayi, mambu ya mbote mpe ya yimbi, mpe bakumata mpe kukulumuka, na mutindu ti mbala yankaka ya ke kumaka ti muntu kubaka dibanza ya yimbi samu na yawu. Mpe mu zola baka mwa minuti yina ke landa samu na kumeka na kutendula mpe—mpe kusemisaya samu na bampangi ya munu, pwelele na mutindu mu lenda sala yawu.

¹⁵ Mpe mu—mu kele ya kulunga ve mpe mu ke kuka ve kutuba kima mosi yina lendaka wakana mbote na ntwala ya bantu yayi

me longukaka. Mu longukaka ve, mpe mu kele ya kukondwa yawu. Kasi mu vwandaka...mu zola Mfumu. Mpe Mfumu pesaka munu, na kutala, mutindu yankaka ya kununga mioyo, na nzila ya dikabu ya Kinzambi, samu yawu fika dibulu ya kima yina bibuti ya munu vwandaka na kiyeka ya kupesa munu ve, kulonguka. Mu me butuka na dibuta mosi ya bampatu, na bana kumi, mpe tata ya mbevo, mpe mu vwandaka na siansi ya kulonguka ve. Na yawu, kasi, na lubutuku, kima mosi salamaka ti...nzingilu mosi na Nzambi, samu na mama mpe tata ya munu. Mpe beno me tangaka disolo ya munu. Mpe, na nzila ya yawu, mu ke na kumeka kusala na lweka ya munu, na bampangi ya munu, samu na kubenda bansumuki na Klisto. Mpe ntangu yayi munu...

¹⁶ Mu ke nganga-nkisi ve. Kasi na ntangu nionso munu, na ntwala kuzibula Ndinga, mu ke zolaka kutuba mwa fioti na Nsoniki. Mpe beto lenda kulumusa diaka bayintu ya beto samu na mwa ntangu fioti.

¹⁷ Tata ya beto ya ntalu, Nge ke Nzambi ya beto, mpe beto ke kwisa na Nge samu na Nsangu ya mbote. Mu ke na ntwala ya bana ya Nge, ba-pasteur ya Nge, mpe bampangi yayi ke na lukwikilu ya ntalu mutindu mosi na munu. Mpe ntima ya munu me fuluka na kiese na kuwa babakala yayi ba me bakula yimbi, mpe ba tindaka bawu na balupitalu ya bilawu, samu na mambote ya Kimfumu ya Nzambi; kumona mutindu Nge ke na kubokila bana ya Nge na bilumbu yayi ya nsuka.

¹⁸ Mpe ya kieleka beto ke kwikila, Tata, ti beto ke na kuzinga na ntangu ya nsuka. Mutindu profete tubaka, "Nsemo ke vwandala na ntangu ya nkokila." Mpe beto me kwikila bubu yayi ti beto ke minati ya Nsemo ya Nsangu ya mbote yayi ya nene, na lemvo ya Nge, Nge me pesa beto muswa ya kunata yawu tii na nsuka ya ntoto, kisika reveal yayi me kuma.

¹⁹ Mpe mu ke sambila, Tata, ti, kubanda na ntima ya munu, ti Nge pesa munu muswa ya kutuba na bampangi ya munu, na suka yayi, mitifi mpe kikuma ya luzingu ya munu samu na Nge, samu bawu lenda kubakula. Pesa yawu, samu beto lenda kuvwanda na zola ya kulunga, mpe kimpangi, mpe ngwisani, na kisalu ya muvimba ya Nsangu ya mbote. Samu beto me lomba yawu na Nkumbu ya Yesu, Yina sambilaka ti beto kuvwanda mosi, mutindu Yandi na Tata ya Yandi vwandaka Mosi. Na kukwikilaka yayi, ti, "Na yawu bantu nionso ke zaba ti beno kele bilandi ya Munu, ntangu beno ke na zola, mosi samu na yankaka." Amen.

²⁰ Ntangu yayi...Mpe mu ke na kivuvu mpe mu me tula ntima ti mu me lembisa beno ve bampangi-babakala mpe bampangi-bakento, samu na diambu yayi. Kasi mu banza ti mu ke sepela kutuba pwelele, samu beno kuwa ve yina muntu yankaka me tuba. Mpe mu me tendulaka, na bantangu mingi,

na balukutakanu yankaka ya balongi, kasi yayi ke ntangu ya munu ya ntete samu na kimvuka ya Chicago, mpe mu ke sepela ti beno zaba munu mbote-mbote, samu na yina mu ke kumeka na kusala.

²¹ Na kati ya Nsangu ya mbote ya ntama ya kusakumuka awa, na kapu 26 ya Buku ya ba-Actes, beto ke tanga:

Na yawu, O ntinu Agrippa, munu mangaka ve na kutumama na vision yina katukaka na zulu:

²² Yayi kele, ya kieleka, Paul yina ke na kuzonza. Na yina, beto nionso, mutindu balongi, beto ke zolaka kubaka yandi mutindu mbantu, samu yandi . . . Beto, na ntima mosi, beto ke kwikilaka ti yandi vwandaka ntumwa ya dibuundu ya Bantu ya makanda, ti Nzambi bokilaka yandi na kuvwanda mbangi samu na Bantu ya makanda. Mpe bantu tulaka ntembe na ministere ya yandi.

²³ Mpe na mumesanu, kana kima mosi ke na nganda ya mumesanu, bantu ke tulaka na yawu ntembe. Ya ke vwandaka, mpe mu banza ti ya ke vwandaka kaka mutindu yina; bantu ke tula na yawu ntembe. Mpe mu banza ti ntangu yankaka pasteur ke tulaka ntima ve na—na mambu yina bawu ke waka, mpe mu banza ti ba ke na muswa ya kusala yawu. Samu, kana mu ke bakula lubangulu ya mpova yayi *pasteur*, ya zola tuba “mvungi.” Mpe, yawu yina, yandi kele mudisi, to ntwadisi, ya kimvuka ya babakala mpe bakento yina Mpeve-Santu me tula yandi mukengi. Mpe yandi ke na muswa ya kuzaba mutindu ya madia yina mameme ya yandi ke na kubaka, mpe kisika yawu me katuka. Mu banza ti yandi kele na muswa ya kusala mutindu yina.

²⁴ Mpe kana pasteur, to ntangu yankaka bantu, lendaka monana fioti ti ba ke tula ntima ve, ya lenda ve, ata fioti ve, ya lendaka yangisa muntu mosi ve. Ya lendaka nata kaka luzitu na ntima ya muntu, samu na muntu yina, yina ke na lweka yango, yina me tula na yawu ntembe. Mpe, na manima ya nionso, kana nge me zaba mbote ve ti nge ke ya kusungama, yinki mutindu nge lenda tambula na lukwikilu?

²⁵ Kana nge me tula na mabanza ya nge ti . . . Ntangu yayi, yayi me fwanana na psychologie; ya lendaka vwanda mutindu yina, mpe ya ke mutindu yina, kasi ya kele mbote mingi. Kasi kana ya kieleka, na kati ya ntima ya nge, nge lendaka banza ti nge lendaka ata fioti ve kutelama na mesa, ya lendaka salama ti nge ke kuka ve. Beno me mona? Nge fwana . . . Ya kele kaka mpasi ve.

²⁶ Beno fwana kwikila. Beno fwana vwanda na lukwikilu. Beno fwana vwanda na kivuvu. Mpe yinki mutindu beno lenda tula ntima na konso kima yina kana beno—kana beno me zaba ve kisika beno ke na kukwenda? Yinki mutindu mu lendaka kwenda na nzila yina mu me kumaka ntete ve, na kutwadisaka na mbangu mingi, na ba-virage bisika nionso, na kuzabaka ve yina ke na kubumba virage yina ke na ntwala? Beno fwana zaba

kisika beno ke na kukwenda, to beno ke zaba ve mutindu ya kutambula. Mpe muntu nionso lendaka vwanda mutindu yina. Na yawu kana beno lenda, beno me mona yawu, ya me monisama na beno, mpe beno me zaba kisika beno ke na kukwenda, na yina kima mosi ve ke kanga beno nzila.

²⁷ Mpe yawu yina, mu banza, Paul, diambu yayi yandi vwandaka meka ti Agrippa kubakula awa. Yina, yandi—yandi tubaka na bawu ti, “Ntama mu vwandaka mosi ya beno.”

²⁸ Mpe mu banza, keba ve, kana—kana mpangi-bakala yayi ya Baptiste, mpe kana yandi lendaka kwenda na dibuundu ya ba-Baptiste na suka yayi, yandi na kento ya yandi, yina lendaka vwanda ntangu yankaka kimbangi ya bawu. “Ntama mu—mu vwandaka mosi ya beno.”

²⁹ To, Dibuundu ya Klisto, to mpangi-bakala yayi ya Campbellite, lendaka kwenda na—na bantu ya yandi. Mu banza ya kele nkumbu ya kitoko mingi; Bilandi ya Klisto, ba ke bokilaka yawu, kasi ya kieleka ya ke malongi ya Alexander Campbell. Na yawu Dibuundu ya Klisto me basika na beno, samu na musiki. Ya kieleka, mutindu yina ve? Mpe kana yandi lendaka vutuka kuna na bawu, yandi lendaka tuba, “Ntama mu vwandaka mosi ya beno.”

³⁰ Mpe Paul yutukaka kuna na Ntinu Agrippa, mpe Festus, mpe tubaka, “Ntama mu vwandaka mosi ya beno. Mu vwandaka Pharisien ya ba-Pharisien.” Yandi longukaka na nsi ya Gamaliel, mulongi ya nene, mpe yandi zabaka misiku mpe bantumunu ya bawu nionso, mpe mambu yina bawu vwandaka kwikila mpe yina bawu vwandaka kwikila ve. Mpe yandi tubaka, “Mu niokulaka mpe Dibuundu ya Nzambi tii na lufwa.” Beno me mona? Yandi tubaka, “Kaka diambu yina bantu ke tudila munu ntembe, mu niokulaka yawu.”

³¹ Mpe mu ke banzaka ntangu nionso ti lufwa ya Etienne yangisaka Paul mingi, samu ntangu yandi monaka nkembo yina vwandaka na kizizi ya Etienne. Ntangu yandi talaka na zulu, ntangu matadi vwandaka bula yandi pene-pene ya lufwa, mpe yandi tubaka, “Mu me mona Yesu me telema na diboko ya kibakala ya Nzambi.” Mpe beno zaba, beno lenda kufwa munati-nsangu, kasi beno lenda ata fioti ve kufwa nsangu ya yandi. Mpe nsangu yango, ata ti Etienne kwendaka kutana na Yesu, ata mutindu yina, nsangu ya yandi kwendaka kaka na ntwala, samu Paul landilaka na kutubila yawu, mpe, ti, yandi vwandaka “fioti mingi” na kati ya bawu, mpe yandi vwandaka ya kulunga ve samu ba bokila yandi mosi ya bawu, Samu yandi pesaka kimbangi mpe—mpe yandi ndimaka na kufwa muntu yayi ya santu.

³² Mpe yawu yina, Paul, mutindu bantu nionso lendaka sala na ntwala ya bantu, Paul vutulaka, kimbangi ya yandi—ya yandi, na mbatukulu, na yina yandi vwandaka; Mpe yandi tulaka yawu

mpe vwandisaka yawu na zulu ya Masonuku, samu na kutilisa ti yina yandi vwandaka sala vwandaka Masonuku. Ata ti yawu swaswanaka na kundima ya bawu, kasi ya vwandaka talisa na bawu ti ya vwandaka Masonuku.

³³ Na yina, mu banza ti beto... Nionso yina, mu me tubaka, bampangi, beno yina ke vwandaka na balukutakanu yango, ti, kana kilumbu mosi beno me mona munu kutubila mambu yina ke na Masonuku ve, na yawu mu banza ya kieleka ti... to mpangi yankaka, beto fwana kwisa mosi na yankaka mpe kutuba, "Yina ke na kati ya Biblia ve," beno me mona. Kana yawu ke na Biblia, beno fwana vwanda na ntendulu ya luswaswanu; kasi, ya kele, kana ya kele na Masonuku, mbote mingi.

³⁴ Ntangu yayi, Paul vwandaka pesa ntendulu ya yandi samu na yina profete tubaka, mpe yina Moise tubaka, yina ke salama. Mpe yandi kutanaka na Yesu na nzila, na vision. Mpe Yesu yango bokilaka yandi.

³⁵ Na yina, ya lendaka vwanda diambu ya mpasi ve samu na ba-Juif yina, mutindu yandi tubaka, "Muntu ya lukumu Festus," mpe—mpe nionso yina, ti yawu... "ya lendaka vwanda diambu ya kuyitukisa samu na nge, ti Nzambi ke vumbula bafwa?" Beno me mona? "Samu kana beno zaba yina Nzambi vwandaka ntama, na nzila ya Masonuku, ya kieleka beno ke zaba ti Yandi ke na kiyeka ya kuvumbula bafwa."

³⁶ Na yawu yandi tubaka, yandi tubaka na bawu kimbangi ya yandi na nzila ya Damas, samu na yina salamaka, ti, samu bawu zaba ti Yesu yayi yina—yina ya vwandaka longa kotisaka bawu na muvusu mingi samu yandi vwandaka longa Yawu, vwandaka Nzambi yina bawu vwandaka sadila ntangu nionso. Mpamba ve, Yandi vwandaka na bawu na ntoto ya kuyuma, Yandi muntu vwandaka twadisa bawu, Yandi vwandaka Nsemo yango; Tiya, Dikunzi ya Tiya yina vwandaka twadisa bawu. Mpe Yandi monanaka na Paul na kima yina mosi, Nsemo diaka, yina fwaka yandi meso. Mpe yandi tubaka, "Nge kele Nani, Mfumu?"

³⁷ Mpe Yandi tubaka, "Mu kele Yesu, yina nge ke na kuniongisa. Mpe ya ke vwanda mpasi samu na nge na kubula makulu na bantunga."

³⁸ Mpe yandi vwandaka meka na kutendula na bawu yina yawu vwandaka, mpe—mpe yandi vwandaka meka na kulonga bawu ti, yina yandi vwandaka talisa na bantu, ya vwandaka, ti, "Yesu Klisto vwandaka Mesiya," ti, "Yandi kufwaka, mpe Nzambi vumbulaka Yandi na lufwa." Mpe yina fwananaka na Masonuku. Ti, "Ntangu yayi Yandi me zanguka na Zulu, na Nzambi Tata," mpe ti—ti yandi vwandaka mbangi ya mvumbukulu ya Yandi. Mpe, ti, bimangu yayi, mpe bidimbu, mpe mambu ya ngitukulu, yina vwandaka yitukisa bantu, vwandaka mambu ya malu-malu ve samu na mukwikidi ya kieleka, ya Masonuku, samu Biblia me tubilaka yawu.

³⁹ Beno tala na ntangu ya baprofete, mutindu ya pesamaka na profesi, mambu yina, na kwizulu ya Mesiya, mpe mambu yina Yandi ke sala, “Kikata ke dumuka mutindu mbuluku,” na Esaie 35 mpe Masonuku ya mutindu na mutindu yina yandi lendaka tubila. Beto kele na yawu ya kusonama awa ve, kasi ntangu yankaka ya vwandaka baka yawu mpe kutubila yawu na nkufi ntangu yandi bakaka ndinga na ntwala ya bantinu; samu, ntangu yankaka bawu vwandaka na ntima ya yinda ve samu na yandi mutindu beno ke na yawu samu na munu. Na yawu, na manima yandi—yandi vwandaka tendula yawu, mpe yandi vwandaka tuba na bawu ti Nzambi yina bawu vwandaka sadila . . .

⁴⁰ Na yawu, diaka, yandi tubaka, “Na nzila yina ba ke bokilaka *kinzambi-nzambi*,” ya zola tuba, “bulawu,” beno me mona. “Na nzila yina ba ke bokilaka kinzambi-nzambi, ya ke na nzila yina mu ke sambilaka Nzambi yina beno ke sambilaka.” Beno me mona, “Na nzila yina ba ke bokilaka kinzambi-nzambi.”

⁴¹ Mu me ndima ti, bubu yayi, kana beto me telema na mabuundu ya beto ya ntama, mumbandu ba-Presbyterien, ba-Catholique, ba-Baptiste, mpe yina yankaka, beto lendaka pesa kimbangi ya mutindu mosi na bantu yina me tuba ti bawu me zola, mumbandu, kutinda mpangi-bakala yayi na lupitalu ya bilawu, to kima mosi ya mutindu yina. “Na nzila yina ba ke bokilaka kinzambi-nzambi, ya ke na nzila yina mu ke sambilaka Nzambi ya batata ya beto.”

⁴² Mpe yina vwandaka kimbangi ya nene na ntwala ya Agrippa, na mutindu ti ata mpe na ntangu ya vwandaka tuba, Agrippa bokaka, mpe yandi tubaka, “Paul, Saul, na mwa ntangu fioti nge ke ndimisa munu na kuvwanda Muklisto.” Beno me mona, mutindu, yandi longaka Masonuku pwelele mingi, ata ti ya vwandaka ya kuswaswana na synagogue ya yandi. Kasi Masonuku vwandaka pwelele mingi, na mutindu ti yandi tubaka, “Na mwa ntangu fioti nge ke ndimisa munu na kuvwanda mutindu mosi na nge.”

⁴³ Paul tubaka, “Mu ke zola ti nge vwandaka mutindu yina, ya kieleka, kasi mu zola ve ti nge vwandaka na miniololo mutindu mu kele,” beno me mona, kasi yandi kuvwanda mukwikidi mutindu yandi. Na nzonzolo yankaka, kana munu . . . “Mu ke lomba na Nzambi ti nge mona luzabusu mutindu—mutindu mu ke mona yawu.” Na nzonzolo yankaka, “Mu—mu zola ti nge sala yawu.” Beno me mona? “Mu zola ti nge sala yawu.”

⁴⁴ Ntangu, Festus, mu banza, tubaka na yandi ti yandi me “longukaka mingi,” yandi vwandaka “na mubulu na yintu ya yandi.” Kasi yandi tubaka na yandi ti yandi—ti yandi vwandaka mutindu yina ve; ti yandi—yandi zabaka kisika yandi vwandaka.

⁴⁵ Mpe mu lendaka tuba mutindu yayi, na suka yayi, bampangi. Ya kieleka mu zola ti mu lendaka . . . Samu na kukifwanikisa na

luzingu ya Paul ve, kasi kaka samu na kutula mwa fondasio mosi. Mpamba ve, bantu mingi yankaka kele awa yina ntangu yankaka ke tuba na suka yayi, kasi mu zolaka kubaka ntangu yayi ya mbote samu na kutuba mutindu yayi. Ntangu yayi mu zola ti mabuundi nionso yankaka, mutindu mu me kuwa beno kutanga yawu, Tempelo ya Bethel, ba-Independant, ba-Assemblée de Dieu, mpe bayina yankaka... Ya kieleka mu zola ti beno mona yina mu ke monaka; ti beno kumona. Mu zola ti beno mona vision yina mu ke monaka, na yawu beno lendaka vwanda na lubakusu ya mbote, samu na ministere yango.

⁴⁶ Ntangu mu katukaka na dibuundi ya ba-Baptiste; mpe Docteur Roy E. Davis, yina tumbikaka munu na église Missionnaire Baptiste, yandi tubaka na munu ti mu lotaka ndosi ya yimbi, ntangu vision ya Mfumu kwisaka mpe—mpe tubaka na munu. Mpe—mpe beno zaba yina kubeluka ya nzutu vwandaka na ntangu yina, yawu vwandaka na nsi mingi.

⁴⁷ Mpe—mpe mu zabaka kima mosi ve samu na ba-Pentecotiste. Mu waka ti bawu vwandaka nkonga ya ba-exalté yina vwandaka lala na ntoto mpe yina vwandaka tangisa mate mutindu bayimbwa ya bilawu, mpe ba fwana tula bawu mupepe mpe kuvutula na bawu pema, mpe mambu ya mutindu yina. Yawu yina kaka mu zaba samu na ba-Pentecotiste.

Yandi tubaka, “Nani nge ke banza ke kuwa nge?”

⁴⁸ Mu tubaka, “Kana Nzambi me tinda munu, ya ke na kisika mosi mpe muntu mosi kisika Yandi me tinda munu.” Ya kieleka. Beno me mona? “Mpamba ve,” mu tubaka, “Docteur Davis,” mu tubaka, “Yandi vwandaka kieleka kuna; mu telamaka mpe mu talaka Yandi,” mu tubaka. Bawu tubaka na munu ti ba-vision yina...

⁴⁹ Mu ke mukwikidi ya nene, bampangi, ti—ti makabu mpe balubokilu ba ke sobaka yawu ve. Mu—mu ke kwikila yawu. Beno me butukaka, beno lenda vwanda ve kima yina beno kele ve. Mpe na ntangu nionso beno ke meka kuvwanda yina beno kele ve, beno ke meka na kusala kisalu ya muntu ya luvunu. Mpe Nzambi kubika munu kufwa na ntwala kuvwanda muntu ya luvunu, beno me mona. Bika mu vwanda kaka yina mu kele, na manima yawu kuma ya kieleka mpe pwelele. mpe—mpe, na yawu, bika—bika mu vwanda mutindu yina, na manima muntu nionso ke zaba. Na yawu beno ke zaba kaka.

⁵⁰ Mpe na yawu ntangu yayi, mutindu beno me zaba, mu me tangaka mingi ve, mutindu mu me tuba. Na yawu na kati ya... na théologie, mu kele muntu ya mpamba. Mpe mu banza ti beno zaba yawu, beno me mona. Mutindu longi, na mpasi mu lenda tuba ti mu kele mosi, samu mu me longukaka ve mpe mu zaba bampova ve, mpe nionso yina. Kasi yina ya fioti mu ke na yawu, samu... yina mu ke na yawu mutindu luzabu ya kuzaba,

na lemvo ya Yandi, Mfumu Yesu, mu ke meka na kukabula na bampangi ya munu nionso bisika nionso, kukabula yayi.

⁵¹ Mpe, kasi, ntangu mu bikaka dibuundu ya ba-Baptiste... yina ke dibuundu mosi kaka mu me kotaka, to yina ba tumbikaka munu. Mpe ba tumbikaka munu na mvula 1933, na église Missionnaire Baptiste, na Jeffersonville, Indiana. Ya ke... ya ke mundimi ya Lukutakanu ya ba-Baptiste ya Sud. Na yawu beto, na ntangu yayi, mu... ntangu mu basikaka mpe mu...

⁵² Ntangu yayi, dibuundu ya ba-Baptiste kele dibuundu ya kimpwanza. Beto—beto nionso me zaba yawu, ti ya kele—ya kele... Beno lenda longa konso kima yina beno me zola, kana dibuundu ya beno ke ndima yawu. Bawu... Beno lenda longa nionso yina beno me zola.

⁵³ Mpe mu ke zolaka mutindu yina, beno me mona, samu mu ke kwikilaka ti ya me fwanana na bantumwa. Samu, yintu, ndonga ya kulutila zulu na kati ya dibuundu, kele mvungi, beto me mona yawu, pasteur. Mpe—mpe kana... Kana évêque mosi to muntu yankaka ke katula luzayikisu yayi pasteur ke na yawu, na yawu yinki mutindu Nzambi ke sala na kati ya dibuundu ya yandi? Beno me mona, beno lenda bakula yawu ve. Na yawu, mpe mu ke na...

⁵⁴ Ntangu mu basikaka kuna, mu kutanaka na kimvuka ya ntete, ya vwandaka kubeluka ya Betty Daugherty, na Saint Louis, na Missouri. Mpe yawu vwandaka dibuundu ya ba-Pentecotiste Uni, to dibuundu ya ba-Pentecotiste ya Nkumbu ya Yesu, kisika pasteur yango vwandaka sambila, mpe mwana ya yandi ya kento belukaka. Ya kieleka, mu banza ti yawu yina salaka ti yandi vwanda pentecotiste, samu bawu vwandaka kukibokila bantu ya, "Yesu Kaka." Mpe mu banza ti yawu yina salaka bawu ba-pentecotiste, samu ba vwandaka kukibokila mutindu yina, mpe yawu yina vwandaka luswaswanu. Na yawu, mbote, na yawu katuka na kisika yina mu kwendaka na...

⁵⁵ Mpe bakala mosi ya mbote; vwandaka na lukutakanu ya nene na Saint Louis, foto na yawu kele na kati kuna. Mpe beto bakaka Auditorium ya Kiel; mpe na mpimpa ya ntete, to ya zole, ya vwandaka na bantu mafunda kumi na yiya kufulusaka yawu, mpe beto lendaka ata ve... ya lombaka ti beto tula bapulusu na mielo, samu bantu kukota ve.

⁵⁶ Mpe kubanda kuna, na kulandilaka tii na Richard T. Reed, ya Tabernacle ya Bon Vieux Temps ya Biblia, na Jonesboro, yina vwandaka diaka ya organisation yango. Mpe katuka kuna, tii na Docteur G. H. Brown, ya organisation mosi, na 505 ya Bala-bala Victor ya Little Rock, na Arkansas. Mpe, katuka kuna, tii na Côte Ouest.

⁵⁷ Na manima ntangu mu kumaka na Côte Ouest, mu kutanaka na tiya. Na yawu mu monaka ti ya vwandaka na bakukabwana mingi na kati ya ba-pentecotiste, na kati ya ba-organisation

ya bawu, mutindu beto ba-Baptiste ke na yawu. Beno me mona, bawu vwandaka—bawu vwandaka na baluswaswanu mingi, yawu vwandaka, bawu vwandaka na baluswaswanu ya mutindu na mutindu. Yawu vwandaka ba-Assemblée de Dieu, mpe Dibuundi ya Nzambi, mpe bayina yankaka, mpe bayina yankaka, mpe bayina yankaka, mpe—mpe luswaswanu. Mpe bawu kabwanaka kati na bawu, mpe bawu tulaka bandilu ya fioti-fioti. Mpe bampangi yankaka nionso bandaka kukwisa na munu, mpe bawu tubaka na munu, “Tala, nge ke muntu ya Yesu kaka, na kimvuka yina kuna.”

Mu tubaka, “Ve, mu—mu ke kukibokilaka mutindu yina ve.” Beno me mona?

Yandi tubaka, “Kasi, nge ke vukanaka na bawu.”

⁵⁸ Mu tubaka, “Mbote, yina—yina ke kumisa munu mosi ya bawu ve.” Beno me mona? Mpe mu tubaka, “Munu—munu—munu kaka... Bawu vwandaka bampangi.”

⁵⁹ Mpe yandi tubaka, “Kasi, bawu kele nkonga ya... Mpamba ve, bawu ke na kima yankaka ve kasi mavala kisika ba-vautour ke kulumukaka mpe nionso yina, kuna, mutindu yina. Kisika...”

⁶⁰ Mu tubaka, “Ntangu yayi, lemvokila munu. Mu kutanaka na basantu ya kieleka kuna. Mpe bawu kele bantu ya Nzambi.” Mpe mu tubaka, “Mu—mu ke ndima ata fioti ve ti ba bokila bawu bantu ya yimbi; samu, bawu ke mutindu yina ve.”

⁶¹ Mbote, na yawu mumekaka na kutelama na yawu ntangu ya yinda, kukondwa kusoola lweka mosi to yankaka. Mbote, mu bandaka na kulonguka yina vwandaka mabanza ya bawu, mpe yina vwandaka bakukabwana ya bawu, mpe yina salaka ti bawu kukabwana. Mpe mu monaka ti bimvuka zole ya nene vwandaka na kati ya bawu, mosi na yawu, nkumbu ya yawu vwandaka Yesu Kaka, mpe yina yankaka vwandaka ba-Assemblée de Dieu. Mpe ba basisaka bawu, to bawu kabwanaka, samu na diambu ya mbotika ya masa; mosi vwandaka sadila “Tata, Mwana, Mpeve-Santu,” mpe yina yankaka vwandaka sadila Nkumbu ya “Yesu.”

⁶² Mbote, mu talaka, mpe na balweka nionso zole bawu vwandaka na bantu ya nene, misadi ya Nzambi. Mpe mu banzaka, “O Nzambi, kana mu lendaka mona bawu nionso ke kwenda na ntwala na ku... kukwenda kaka na ntwala mpe kuvwanda na... kasi bawu kutula bandilu ya bawu ve, mpe kutuba, ‘Beto ke wisana ve beto na beto.’” Kasi mu me mona ti, na yayi, mpeve ya yimbi me kota na kati ya bawu mpe me tula kuyina mpe mayele ya yimbi, na mambu yina kumaka na kati ya bawu. Mu banzaka, “Ya kele kieleka yawu yina diabulu ke zolaka. Ya kele kaka yina yandi ke zolaka.” Na ntangu nionso beno ke kutilisa minduki ya beno na bamosi mpe bayankaka, yandi ke nwana diaka ve. Mpe mu... .

⁶³ Mpe na yawu, nsuka-nsuka, ya kumaka ntangu ya kusukisa diambu. Mpe ntangu ya kusukisa diambu yango vwandaka na Seattle, Washington, na kutala na mvula 1946. Mpe kilumbu mosi na suka ba nataka munu kisika mosi ya nene na kati ya hotel, mutindu yayi awa, samu na madia ya suka na balongi yankaka. Mpe ya lombaka ti mu solula ntete-ntete na babakala yina zole.

⁶⁴ Mpe mosi ya bawu vwandaka Docteur Ness. Mu banza ti beno bampangi ya ba-Assemblée de Dieu ke na kubambuka yandi. Yandi vwandaka muntu ya kizunga ya nord-ouest; muntu mosi ya nene, ya mayele, ya ndwenga. Mpe yandi vwandaka talisa ba-Assemblée de Dieu.

⁶⁵ Na manima, Docteur Scism, ya église ya ba-Pentecotiste Uni. Mu banza ti beno bampangi ya ba-Pentecotiste Uni ke na kubambuka na yandi. Yandi vwandaka diaka muntu ya bizunga ya nord-ouest kuna, yandi vwandaka mfumu ya bawu mpe ya bizunga yina kuna.

⁶⁶ Mbote, bantu yayi zole kukutanaka. Mpe ya lombaka ti ba nata munu na ntwala ya bawu, samu kubendana kukumaka ngolo, mpe ba vwandaka nwanisa munu na balweka nionso. Mpe mu banzaka, “Yinki mu fwana sala? Yinki mu lenda sala?”

⁶⁷ Ntangu yayi, mbote, bawu tubaka, “Mbote, nge fwana vwanda na lweka ya mosi to yankaka. Kana nge ke tambula na bantu ya Nkumbu ya Yesu, nge fwana vwanda muntu ya Nkumbu ya Yesu. Mpe kana nge ke tambula na ba-Assemblée de Dieu, nge fwana bika bantu ya Nkumbu ya Yesu, mpe kuvwanda muntu ya ba-Assemblée de Dieu, to nionso yina.” Yawu kumaka na kisika mosi yina mu lendaka talisa dibanza ya munu.

⁶⁸ Mu sambilaka mingi na suka yina na ntete mu kwenda kuna. Mu tubaka, “Nzambi, sadisa munu. Samu, ya ke na bantu zole ya nene; ya ke mafunda ya bisadi kuna. Mpe Nge me tinda munu awa na ministere mosi. Mpe bawu zole kele bisadi ya Nge. Mpe mu lendaka pesa mwa lusalusu yayi mu ke na yawu na organisation mosi na ntangu ya ke na kunwanisa yina yankaka?” Beno me mona? “Mu—mu lenda kuwa mbote ve kana mu me sala mutindu yina. Mu ke banza ve ti ya ke vwanda luzolo ya Klisto samu na munu na kusala yawu.” Mpe mu tubaka, “Nzambi, sadisa munu mpe pesa munu kima ya kusala, to pesa munu kima ya kutuba.”

⁶⁹ Na yawu mu vwandaka na muntu mosi ve. Ya lombaka ti mu telema kuna, kaka Mfumu Yesu na munu, na suka yina.

⁷⁰ Mbote, kimpaka ya nene kubandaka. “Yinki nge ke sala? Wapi—wapi—wapi lukanu nge ke baka?”

⁷¹ Mu tubaka, “Mu bakaka dezia lukanu ya munu. Ti, lukanu ya munu, kele kutelama na kati-kati ya beno zole, kasi kukota na organisation mosi ve; mpe kutuba, na ntangu mu me yamba beno zole, ‘Beto kele bampangi.’” Beno me mona? Beno me mona, beto

ke bampangi. Beno me mona? Mpe mu tubaka, “Mu memekaka kutanga babuku nionso mu lendaka tanga, mutindu diambu yango kubandaka, yina ba bokilaka ‘diambu ya malu-malu,’ mpe mutindu bawu kabwanaka, mpe mutindu diambu *yayi* bandaka mutindu *yayi* mpe mutindu *yina*.” Mpe mu tubaka, “Na kuswana *yayi* ke na kati ya beno,” mu tubaka, “ya ke mutindu mosi na diambu yina kabulaka ba-pentecotiste, kilumbu mosi . . . na manima ya Pentecote. Bawu bandaka na kuswana na kati ya bawu.” Mpe mu tubaka, “Diambu yango ke kabulaka diaka.”

⁷² Mu tubaka, “Ya kele na mutindu ti kisika mosi ya kuwakana kuvwanda na kati ya beno, beno bampangi? Ya lenda vwanda na kima yina—yina lendaka simba?”

⁷³ Mbote, bawu lendaka zibula yinwa ya bawu ve samu na yawu, samu yawu vwandaka mavanga mingi. Beno zaba, pene ya bamvula kumi na tanu, makumi zole me luta, mutindu yawu vwandaka, samu kimvuka mosi kukabwanaka na yankaka, mpe kuswana vwandaka mingi.

⁷⁴ Na yawu mu tubaka, “Mbote, bampangi, beno tala yina mu ke sala. Mu ke kwenda na . . . Nzambi tindaka munu ata fioti ve samu na kubotika, ata mutindu yina. Yandi tindaka munu na kusambilu samu na bana ya Yandi ya bambevo.” Mu tubaka, “Na yawu, mu ke sambila—sambila samu na bana ya kubela, mpe beno balongi beno ke botika beno mosi,” mu tubaka.

⁷⁵ Mu tubaka, “Ntangu *yayi* mu zola kuyufula beno kima, samu ti beno kubakula.” Mu tubaka, “Mpangi Ness, . . . bantu *yayi* ya Nkumbu ya Yesu, beno ke kwikila ti bawu kuzwaka Mpeve-Santu ntangu bawu tubaka bandinga ya malu-malu mpe salaka diambu ya mutindu mosi na yina beno bantu ya ba-Assemblée de Dieu ke salaka?”

Yandi tubaka, “Ya kieleka.”

⁷⁶ Mu tubaka, “Mpangi Scism, nge ke kwikila ti bantu ya ba-Assemblée de Dieu kuzwaka Mpeve-Santu ntangu bawu tubaka bandinga ya malu-malu mpe salaka diambu ya mutindu mosi na yina beno ke salaka na manima ya mbotika?”

Yandi tubaka, “Ya kieleka, mu me ndima.”

⁷⁷ Mu tubaka, “Ntangu *yayi*, Biblia me tuba, ‘Nzambi ke pesaka Mpeve-Santu na bayina ke tumamaka na Yandi.’ Ntangu *yayi*, nani tumamaka na Yandi? Nani tumamaka na Yandi? Nani na kati ya beno tumamaka na Yandi? Mpe ti Nzambi pesaka beno zole Mpeve-Santu.” Beno me mona?

⁷⁸ Mu tubaka, “Nge lenda tuba, Mpangi Scism, ti Mpangi Ness ke na Mpeve-Santu ve?”

Yandi tubaka, “Ve.”

⁷⁹ Mu tubaka, “Nge lenda tuba ti Mpangi Scism ke na Mpeve-Santu ve?”

⁸⁰ “Ve.” Beno me mona? Na yawu, bawu zole kwikilaka ti mosi na yankaka vwandaka na Mpeve-Santu.

⁸¹ Kasi, beno me mona, ya ke na mfunu ve, bampangi. Ya ke na mfunu ve. Mpe munu waka, na manima ya mwa ntangu fioti ti . . .

Mu ke vutuka na dilongi ya munu na mwa ntangu fioti.

⁸² Bampangi ba-Finlandais yayi awa, na manima ya kukatuka ya munu na Finlande; kisika Nzambi pesaka beto, mutindu mu banzaka, mosi ya balukutakanu ya beto ya kulutila nene. Kisika mwana-bakala yina kufwaka, yina kuvumbukaka, mpe mambu mingi. Na Stockholm, na Suède, mu kutanaka na Lewi Petrus ya dibuundi ya Filadelfia kuna yandi ke muntu mosi ya nene ya Nzambi, mpe dibuundi ya Filadelfia. Mpangi Gordon Lindsay, yina vwandaka ntangu yayi . . . mu banza. Mu banza ve ti yandi ke mundimi ya yawu ntangu yayi, kasi yandi vwandaka mundimi ya ba-Assemblée de Dieu.

⁸³ Mpe ba-Assemblée de Dieu kele mosi ya bantu ya nene ke simbisaka balukutakanu ya munu, na yinza ya muvimb'a. Mpe bantu ya Foursquare, bayina katukaka na ba-Assemblée de Dieu, kele mosi ya bantu ya nene Quatre coins ke simbisaka balukutakanu ya munu. Ba-Unitaire kele, na yinza ya muvimb'a, mosi ya bantu ya nene ke simbisaka balukutakanu ya munu. Beno me mona? Mpe mu bakaka mutindu yina, kaka samu na kumanisa kubendana yina, na manima mu bakaka lukanu mosi, ti mu ke vwanda na lweka mosi ve na kati ya bakuswana yina. Tii kuna beto lenda mona ti beto kele bampangi, mpe kuvukana, na manima beto—beto nionso ke mona diambu yina mosi kuna, kisika beto ke kuma, mitifi mpe kikuma ya kusala mutindu yina.

⁸⁴ Mpe beno—beno fwana meka mitifi mpe kikuma beno ke na kulanda, ntete. Ntete, beno sosa luzolo ya Nzambi; na manima beno mona kikuma ya beno; na manima beno meka mitifi mpe beno tala kana mitifi ya beno kele mbote. Na yawu, mutindu Yesu tubaka na Marc 11:24, “Kana beno tuba na mongo yayi, ‘Katuka awa,’ mpe beno tula ntembe ve na kati ya ntima ya beno.” Kasi kana beno ke na ntembe na kati ya ntima, ata ti yawu ke luzolo ya Nzambi, to mitifi to kikuma ya beno kele mbote ve, wapi mutindu yawu ke kota na kisalu? Kasi ntangu beno me zaba ti mitifi ya beno kele mbote, mpe yawu ke luzolo ya Nzambi, mpe kikuma ya beno kele mbote, yawu fwana kota na kisalu. Yimeni, to Nzambi tubaka diambu ya luvunu.

⁸⁵ Kikuma ya kieleka yawu yina, ntangu mu ke mataka na kisika ya malongi, na bayinzo-Nzambi, muntu mosi ve me waka munu ata fioti ve kutubila mambu yina, mambu yina. Mu ke tulaka yawu kaka na lweka. Beno me mona, yina me tala beno, beno bampangi. Beno me mona? Mu kele awa samu na kusadisa beno na kununga miela na Klisto, na nzila ya dikabu ya Bunzambi, beno me mona. Beno me mona? Mu ke sala

luswaswanu mosi ve . . . Beno pesa mbotika beno mosi. Kasi kana ya me kuma . . .

⁸⁶ Mpamba ve, ba pesaka munu bankumbu nionso. Ba pesaka munu bankumbu, mu zaba ve lutangu, bisika nionso kubanda na "mwana ya Nzambi yina me kituka muntu" tii na "diabulu." Ya kieleka, na nionso. Kasi, na nsuka ya nionso yina, mu ke mpangi ya beno, mwisi-ntoto ya Kimfumu ya Nzambi; mu ke na kusala kintwadi na beno nionso, samu na Kimfumu. Mpe yina kele ya kieleka.

⁸⁷ Ntangu yayi mu ke, kana yawu kele mbote, mpe beno banza ti beto kele na ntangu mingi, mu ke zola kutuba na beno mutindu masolo yango kulutaka. Ya lenda vwanda mbote, bampangi, na mwa ntangu fioti, Mpangi-bakala, Mpangi Ness na bayankaka? Mbote mingi. Mpe yawu lenda vwanda kima yina lenda sadisa beno. Yawu lenda sadisa beno samu beno bakula, mwa fioti.

⁸⁸ Mu sonikaka, awa, mwa mambu yankaka mu ke bambuka moyo yina bandaka kuna. Mpe na yawu bawu yufulaka munu, yinki mu ke kwikilaka samu na yina me tala "butatu," mu ke kwikilaka ti ya ke vwandaka na "butatu" ya Nzambi?

⁸⁹ Ntangu yayi, bampangi, ntangu mu ke tubila yawu, mu banza ti, ntangu yayi ke mana, ti beno ke vwanda kaka bampangi ya mutindu mosi beto vwandaka kubanda ntama. Beno me mona? Kasi mu banza ti mu fwana pesa beno yawu, samu bantu ya beno ke kwisaka na balukutakanu ya munu, mpe ya kieleka mu ke zola ve ti mosi ya bawu kuvutuka, ya kuvunama.

⁹⁰ Mpe mu ke tubaka ntangu nionso na bantu yina ke yufulaka munu bakiuvu, na nganda ya yina mu ke longaka na kisika ya malongi . . . Mpe secrétaire ya munu yandi yayi, mpe nionso yina. Kana ba me yufula munu kiuvu, "Yinki nge me tuba samu na diambu *yayi*, to yinki nge me tuba samu na diambu *yina*?"

⁹¹ Mu tubaka, "Beno yufula pasteur ya beno, beno me mona. Samu, kana yandi me twadisa nge tii na kisika yayi, tii kuna nge me kuzwa Mpeve-Santu, yandi ke landila kaka kutwadisa nge, nge me mona. Beno, beno me mona, beno yufula pasteur ya beno." Samu, mwa bima yina ya fioti-fioti ke nataka mubulu, mpe yawu yina mu ke tinaka yawu, beno me mona.

⁹² Ntangu yayi, mpe ba tubaka na munu ti mu vwandaka muntu yina vwandaka telemina ba-organisation. Ntangu yayi, mu ke mutindu yina ve. Mu banza ti ba-organisation kele mbote, kasi ntangu systeme ya organisation ya beno ke ya kubeba, yawu yina mu ke teleminaka. Beno me mona? Ata ti ya ke bumosi, to—to ya ke butatu, to nionso yina yawu kele, systeme; ntangu beno me kuma na kisika yayi, beno ntangu yayi . . . mpe beno me tuba, "Beto kele bantu ya ba-Assemblée de Dieu."

"Mbote, banani yina kele na simu ya bala-bala?"

⁹³ “Oh, yina kele bampangi ya beto. Ba me—ba me bokila bawu ba-Pentecotiste Uni.”

“Mbote, nani yina kuna?”

⁹⁴ “Oh, bayina kele bampangi ya Quatre coins. Oh, beto ke bampangi ya mbote. Beto ke na ngwisani ya nene, mosi na yankaka.”

“Oh, beno nionso ke kwikilaka mutindu mosi?”

“Oh, inga, beto ke kwikilaka mutindu mosi.”

“Ntangu yayi, mbote, yinki ke salaka ti beno vwanda mutindu yayi?”

⁹⁵ “Mbote, bampangi *yayi* ke botikaka mutindu *yayi*. Mpe *bayayi* ke botikaka mutindu *yayi*, ba me pesa beto mukongo. Mpe *bayayi* ke botikaka . . .”

⁹⁶ Mutindu kuna na Afrique du Sud, mpangi-bakala, beto monaka diambu yango. Bawu yufulaka munu. Kimvuka mosi ke botikaka mbala tatu, kizizi na ntwala. Mpe yina yankaka ke botikaka mbala tatu, kizizi na manima. Mpe bawu tubaka . . . Mu tubaka, “Wapi kisika beno me baka yawu?”

⁹⁷ Mosi tubaka, “Ntangu Yandi kufwaka, Biblia me tuba ti Yandi kulumusaka yintu na ntwala,” mpe yandi tubaka, “yawu yina nge fwana kulumusa bayintu ya bawu na ntwala.”

⁹⁸ Mpe mu tubaka, “Mbote,” kimvuka yina yankaka, “yinki . . . Wapi mutindu ya beno?”

Yandi tubaka, “Beno me zikaka ntete muntu mosi na kizizi ya yandi ke tala na nsí?”

⁹⁹ Mbote, mpe yinki beno me zaba? Bawu kabwanaka mpe salaka bimvuka zole, ba-organisation zole. Oh, mawa, bampangi! Yawu yina diabulu ke zolaka. Yawu yina yandi ke zolaka. Yinga. Beno mosi . . .

¹⁰⁰ Ntangu yayi, beno me mona, ya kele Mission ya Foi Apostolique ve, to—to ya kele dyaka mosi to yankaka na kati ya ba-Assemblée Pentecotiste, na lweka yankaka. Yawu yina ve. Ya kele na bantu ya mbote na bimvuka nionso zole, mutindu ya kele awa. Kasi, beno me mona, ya kele systeme ya diambu yango.

¹⁰¹ Ya kele kaka mutindu mosi na Katolika, mutindu mu ke tubaka yawu mbala na mbala. Kana yandi kele muntu ya Katolika, mpe ti yandi ke tula ntima na Klisto samu na mpulusu, yandi me vuluka. Ya kieleka, ya kele mutindu yina. Kana yandi ke tula ntima na dibuundu, yandi me zimbana. Mpe beno nionso bampangi ba-pentecotiste kuzaba, kana beto ke tala na dibuundu ya ba-Pentecotiste samu na kuvulusa beto, “beto kele, bantu ya kiadi, na kati ya bantu nionso,” ya kieleka, samu beto kele ya kuzimbana. Ya kieleka.

¹⁰² Kasi kana beto me tala na Yesu Klisto, na yawu beto me vuluka, “na lukwikilu ya nge,” (ya zola tuba, yinki?) kisalu yina

me kuma na nsuka. Mpe mambu ya fioti-fioti ya kisalu, mpe bidimbu, yina ke sala luswaswanu mosi ve.

¹⁰³ Ntangu yayi, mu tubaka na Mpangi Scism, na ku... mpe Mpangi Ness, "Samu na kupesa mvutu na kiuvu ya nge," mu tubaka, "ntangu yayi, mu ke vwanda na lweka ya muntu mosi ve na kati ya beno bampangi. Mpe mu zaba ti, na ntangu nionso beno ke swana, beno zole me kubwa na diambu yango. Beno me mona? Samu, kulutila mbote mu vwanda na kifu na malongi ya munu, kasi ya kusungama na ntima ya munu, na kisika kuvwanda ya kusungama na malongi ya munu, kasi na ntima ya yimbi." Beno me mona? Mu tubaka, "Na manima ya nionso, ya me tala mutindu ya ntima ya nge."

¹⁰⁴ Mpe mu sadilaka yawu, samu na kuzaba diambu yayi: ti, kana muntu mosi, ya vwanda konso kima yina ya me sala, ata ti ya ke na ngwisani na munu ve, mpe yina yandi ke tuba konso kima yina samu na munu; kana na kati ya ntima ya munu, kaka samu na kisalu, kasi na ntima ya munu mu ke zola ve muntu yina mutindu mu ke zolaka muntu yankaka, na yawu mu zaba ti ya kele na kima mosi ya yimbi na kati awa, beno me mona. Ya kieleka, samu, ya kele—ya ke...ata ti kana yandi...

¹⁰⁵ Mpangi-bakala mosi ya ntwenia kwisaka, ntama mingi ve, mpangi mosi ya ntwenia ya Dibuundu ya Klisto. Mpe, oh, yandi telemaka kuna, mpe yandi tubaka, "Mwana-bakala yayi kele diabulu." Beno me mona? Yandi tubaka, "Yandi ke tubaka samu na Mpeve-Santu." Yandi tubaka, "Ya ke na kima ya mutindu yina ve. Bawu, mbote, kaka bantumwa kumi na zole kuzwaka Mpeve-Santu. Mpe—mpe ba pesaka kubeluka ya Kinzambi na bantumwa kumi na zole kaka." Mpe yandi landilaka kutuba, pene na ndambu ya ngunga mosi.

¹⁰⁶ Mpe mu tubaka, "Vingila fioti, mpangi bakala. Mu banza ti nge lenda pesa munu siansi ya kunwanina Yayı, nge me mona." Mu tubaka, "Nge me tuba ti nge ke tubaka kisika Biblia me tuba, mpe nge ke vwandaka swi kisika Yawu me vwanda swi."

Mpe yandi tubaka, "Beto ke salaka mutindu yina."

¹⁰⁷ Mu tubaka, "Ntangu yayi, nge me tuba ti bantumwa kumi na zole kaka kuzwaka Mpeve-Santu. Biblia me tuba, 'Kuvwandaka na bantu nkama mosi na makumi zole na yinzo ya etaze ntangu Mpeve-Santu kulumukaka, na zulu ya bakento mpe bantu nionso.' Mpe beno zola tuba na munu ti, nge banza ti Paul kuzwaka Mpeve-Santu ve? Mpe yandi kuzwaka Yawu ntama kuna na manima ya yina, nge me mona. Mpe nge me tuba ti, 'Ba pesaka dikabu ya kubeluka ya nzutu kaka na bantumwa kumi na zole.' Mpe Etienne kulumukaka kuna, mwa bilumbu fioti na manima, mpe yandi vwandaka ve mosi na kati ya kumi na zole. Yandi vwandaka ata longi ve. Yandi vwandaka diakre, mpe kulumukaka na Samarie mpe basisaka bampeve ya yimbi."

Mpe mu tubaka, “Oh, mpangi-bakala!” Ya vwandaka swi awa, na kisika ya lendaka vwanda.

¹⁰⁸ Mpe na ntangu ya manisaka, “Kasi,” mu tubaka, “Mu me lemvokila nge samu nge me bokila munu diabulu, samu mu zaba ti nge lendaka tuba mutindu yina ve.”

¹⁰⁹ Na yawu ntangu yandi manisaka, yandi kwisaka. Yandi tubaka, “Ya ke na kima mosi mu zola tuba. Nge ke na Mpeve ya Klisto.”

¹¹⁰ Mu tubaka, “Ntangu yayi, mpangi-bakala, nani mu kele, diabulu to ya Klisto?” Beno me mona? Beno me mona?

¹¹¹ Kasi mu ke tuba na beno, beno me mona, samu ti bakala yango, yandi lendaka tuba ti mu zolaka yandi; ata ti, yandi vwandaka tula ntembe, mpe yandi vwandaka tula ntembe mingi mpe vwandaka sawula. Yandi . . .

¹¹² Mu kele muzombi, mpe na baniamya ya mfinda, lusingu ya munu nionso. Mpe bantu tubaka, “Wapi mutindu . . .” Na ntangu yina mu fwanaka kufwa ulusu yina, na mbele, beno me mona. Yandi tubaka, “Nge vwandaka na boma ya yawu ve?”

¹¹³ Mu tubaka, “Ve. Kana mu vwandaka na boma ya yawu, ya zolaka kufwa munu, beno me mona.”

¹¹⁴ Kasi, beno me mona, beno lenda—beno lenda vuna bawu ve. Bawu zaba kana beno ke na boma ya yawu, to ve. Kana beno ke na boma ya mpunda, mpe beno tala yina mpunda mosi ke sala, yandi ke niata beno. Beno me mona? Na yawu kana beno ke na boma . . . Beno lenda vuna yawu ve. Beno fwana vwanda na yawu ya kieleka.

Ya ke vwandaka mutindu yina na Satana.

¹¹⁵ Ya ke vwandaka mutindu yina na kati ya bantu. Beno fwana zola bantu. Beno lenda vuna yawu ve. Beno fwana vwanda na yawu, to yina ke na kati ya beno ke monana kisika mosi kuna, beno me mona. Ya kieleka. Beno fwana zola bantu, mpe bawu zaba ti beno ke zolaka bawu. Beno me mona, ya ke na kima mosi samu na yawu.

¹¹⁶ Mpe bakala yango ntangu yayi, bokilaka kento ya munu, mwa bilumbu fioti me luta, mpe yandi tubaka, “Mpangi Branham kele kuna?”

Yandi tubaka, “Ve.”

¹¹⁷ Yandi tubaka, “Mbote, mu zola tuba kima mosi. Mu tulaka ntembe na yandi, na théologie, kasi mu me tuba ti yandi kele kisadi ya Klisto.”

¹¹⁸ Mbote, mpamba ve, na yawu na ntwala mu kwenda, yandi tindaka munu mukanda, yandi tubaka, “Mu ke kwisa kuna, na ntangu nge ke vutuka. Mu ke na nsatu ya mbotika yina ya Mpeve-Santu yina nge ke na kuzonzila.”

¹¹⁹ Na yawu, beno me mona, na yawu kana beno vwandaka . . . Kana mu vwandaka na nsatu yina, ya kutuba, “Tala, nge ke na kima mosi ve. Denomination ya nge ya ntama ke na mfunu ve, mpe—mpe beno nionso bantu ya Dibuundu ya Klisto ke na mfunu ve. Nge ke na mfunu ve. Nge ke na bampeve ya yimbi.” Mu lendaka nunga muntu yina ve. Mpe kana mu lendaka tuba na yandi ti mu ke zolaka yandi, kasi mu me tuba yawu ve na kati ya ntima ya munu, yandi lendaka zaba ti ya kele ya kieleka ve. Nionso yawu yina. Beno fwana tuba yawu na kati ya ntima ya beno.

¹²⁰ Mpe ya ke na bankokila yina mu ke kwendaka na kisika ya malongi, na nsi ya lutwadusu ya kimpeve yina, beno me mona. Mu ke banzaka yawu ve. Mu ke kudiaka ve, na manima ya madia ya midi; mpe mu ke manga madia mpe mu ke sambila, mpe mu ke vwanda na kati ya chambre. Samu, Yandi silaka munu ti Yandi ke sala yawu. Mpe na yina mu ke kwenda kukondwa ntembe mosi, samu Yandi silaka ti Yandi ke sala yawu. Na yina, beno me mona, ya munu . . . Mu zaba yina ke mitifi ya munu (yinki?), yina ke kikuma ya munu (yinki?), samu na Kimfumu ya Nzambi kukwenda na ntwala.

¹²¹ Kana muntu mosi kukwenda mutindu *yayi*, mutindu *yina*, ya vwanda konso dibuundu yina yandi ke kwendaka; kana yandi me kwisa na Klisto, yina zola tuba kima mosi ve na munu. Mpe ya ke na kati ya ntima ya munu. Beno me mona? Mpe ata ti, kana beto me kwenda kuna mpe beto me kuma mosi ya Dibuundu ya Klisto, yina ke kaka mbote mingi. Ya kele mbote. Kana yandi . . . Ya vwanda konso dibuundu yina yandi ke kota, ya sala munu kima mosi ve. Kasi kana kaka mu me nunga moyo ya yandi na Klisto, yawu yina kima ya mfunu.

¹²² Na yawu mu tubaka, “Mpangi Ness, ya ke samu na kuvwanda ya kuswaswana ve . . .” Ntangu yayi mu ke . . . Ya ke mbote na kusadila *yayi*, mpangi-bakala? [Mpangi-bakala me tuba, “Ya kieleka.”—Mu.] Mu tubaka, “Mu zola kutuba mpe kutendula.” Mpe, na yayi, mu zola tuba na beno bampangi awa. Ntangu yayi, beno tuba mambu yayi ve na mabuundu ya beno. Kana beno zola, mpe beno lemvokila munu, beno bika ti mu vwanda kaka—kaka—kaka mpangi ya beno ya bakala. Beno me mona? Mpe munu, mpe kana—kana mu ke na kifu, na yawu beno lemvokila munu. Kasi mu zola tendula na nge, mutindu ya ke na bimvuka nionso zole awa na suka yayi, nionso zole ba-Unitaire na ba-Assemblée, diaka, mpe lukwikilu ya ba-trinitaire.

¹²³ Ntangu yayi mu zola tuba mutindu yayi. Mu zola tuba ti mu ke kwikila ti na balweka nionso zole bawu ke na kifu, na ntangu bawu ke swana na kati ya bawu, samu bamitifi ya bawu kele ya mbote ve. Mpe kana bamitifi ya beno kele mbote ve, ya vwanda yina kele kikuma ya beno, kasi bamitifi ya beno na kikuma yina kele mbote ve, na yawu ke tambula mbote ata fioti ve. Ya kieleka.

¹²⁴ Ntangu yayi, bantu yankaka tubaka, “Mpangi Branham, nge ke muntu ya Yesu Kaka.” Mu zola tuba ti yina ke kifu. Mu ke muntu ya Yesu Kaka ve.

¹²⁵ Muntu mosi tubaka, “Mpangi Branham, Nge kele Trinitaire?” Ve, tata. Mu kele Trinitaire ve. Mu kele Muklisto. Beno me mona? Mu—mu—mu kele ve... Ba me sonikaka ve mpova yayi trinitaire na kati ya Biblia, mpova yayi “butatu.” Mpe mu ke kwikilaka ve ti ya kele na Banzambi tatu.

¹²⁶ Mu ke kwikilaka ti Nzambi kele mosi na bisalu tatu: Tata, Mwana, Mpeve-Santu. Kieleka ya kele samu na yina ba tumaka beto na kubotika na Nkumbu ya Tata, Mwana, Mpeve-Santu. Mu ke kwikila ti ya kele Nzambi yina ke kukikulumusa, yina ke kulumuka.

¹²⁷ Ntangu yayi, Nzambi, ntangu Yandi kumonanaka na muntu na mbala ya ntete, Yandi vwandaka na mutindu ya Dikunzi ya Tiya. Beno ke kwikila yawu, mutindu yina ve? Mutangi nionso ya Biblia kuzaba ti Dikunzi ya Tiya yina vwandaka na ntoto ya kuyuma vwandaka Logos, ti yina vwandaka Mbanzi ya Ngwisani, yina vwandaka Klisto.

¹²⁸ Samu ti, Yandi tubaka... Yandi vwandaka... Ya vwandaka ve... Mu ke kwikila ti ya ke na Santu Jean 6 kuna, Yandi tubaka, “Na ntwala Abraham kuvwanda,” “MUNU KELE.” Yandi vwandaka “MUNU KELE.”

¹²⁹ Na yawu, yina vwandaka Nzambi, santu; mpe kana muntu simbaka mongo, yandi fwana kufwa, beno me mona. Mbote mingi. Ntangu yayi, Nzambi yina mosi vwandaka meka na kuvutuka samu na kusala Yandi mosi na kivangu ya Yandi yina Yandi salaka. Ntangu yayi, Yandi lendaka kwisa ve pene-pene ya bawu samu bawu vwandaka bansumuki, mpe menga ya bankombo mpe ya mameme lendaka katula masumu ata fioti ve. Beto zaba yawu. Ya ke fikaka yawu kaka.

¹³⁰ Ntangu yayi, kasi na yawu Nzambi mosi yina vwandaka Dikunzi ya Tiya, Yandi kumaka muntu, na nzila ya Mwana ya Yandi, mpe zingaka na kati ya nzutu yina ba bokilaka Mfumu Yesu Klisto. Biblia me tuba, “Samu ti Bunzambi nionso kele na kati ya nzutu ya Yandi.” Mpe Yesu tubaka na... Mbote, na Timothée ya Ntete kapu 3:16, “Ya kieleka ata muntu lenda kumanga ve, ti mansweki ya lukwikilu ya beto kele nene.” Mpe kana ba lendaka bokila yawu nene, na yina, yinki beto lendaka sala, beno me mona? “Mansweki ya lukwikilu ya Nzambi kele nene, samu Nzambi me monisama na nzutu, mpe monanaka na bawanzio, mpe ba zangulaka yandi na Nkembo,” mpe nionso yina. Ntangu yayi, mpe Yandi tubaka na Santu Jean 14, na Thomas, “Kana nge me mona Munu, nge me mona Tata. Mpe samu na yinki nge ke tuba, ‘Talisa na munu Tata?’” Biblia me tuba, ti, “Nzambi vwandaka na kati ya Klisto, samu na kuvutula ngwisani na kati ya Yandi na bantu.”

¹³¹ Ntangu yayi, Nzambi lenda vwanda bantu tatu ve, Banzambi Tatu ve. To Yesu lenda vwanda Tata ya Yandi Mosi, na bumosi. Beno me mona? Na yawu, beno me mona, ya ke sala ti nionso zole kuvwanda ya kieleka na mutindu nionso luvunu.

¹³² Ntangu yayi, mpe na yawu kana beno lenda simba mbote, ya ke na kisika mosi ve... Kana beto ke na Banzambi tatu, beto ke mimpani. Ntangu yayi, beto zaba yawu.

¹³³ Mutindu Juif mosi tubaka na munu kilumbu mosi, ntangu mu vwandaka solula na yandi, yandi tubaka, "Nani na kati ya bawu kele Nzambi ya nge? Nani kele Nzambi ya nge, Tata, Mwana, to Mpeve-Santu? Nani kele ya nge?"

Mpe mu tubaka, "Na yina, ya ke na Banzambi tatu ve."

¹³⁴ Yandi tubaka, "Nge lenda ve kuzenga—kuzenga Nzambi na bitini tatu mpe kupesa Yandi na Juif."

Mu tubaka, "Ve, tata." Mu tubaka . . .

¹³⁵ Ntangu John Rhyn belukaka na kimpopo, kuna na Fort Wayne, beno zaba; mpe rabbin yayi kuna na Mishawa-... to na Fort... Benton Harbor. Yandi tubaka, "Nge lenda ve kuzenga Nzambi na bitini tatu mpe kupesa Yandi na Juif."

¹³⁶ Mu tubaka, "Ata fioti ve. Mu ke sala yawu ve." Mu tubaka, "Rabbin, ya lenda vwanda mpasi samu na nge na kukwikila baprofete?"

Yandi tubaka, "Ve."

¹³⁷ Mu tubaka, "Na Esaie 9:6, nani ya vwandaka tubila, 'Mwana me butuka na beto, Mwana me pesama na beto, ba ke bokila yandi Conseye, Nzambi ya Ngolo, Ntinu ya Ngemba'?"

Yandi tubaka, "Yina vwandaka Mesiya."

Mu tubaka, "Na yawu, Rabbin, nani ke vwanda Mesiya na ntwala ya Nzambi?"

Yandi tubaka, "Yandi ke vwanda Nzambi."

¹³⁸ "Yawu yina mu banzaka." Beno me mona? Ntangu yayi, beno me mona, yina kele kieleka ya kulunga. Yawu yina Yandi kele. Mpe na yawu mu tubaka, "Tuba na munu ntangu yayi kisika Yesu lungisaka kieleka ve yina profete tubaka ti Yandi ke sala." Mpe yandi bandaka na kudila mpe vwandaka tambula bisika nionso. Mu tubaka, "Na Yina, John Rhyn kumonaka diaka." Beno me mona?

Mpe mu tubaka, "Ntama na Nzambi dibanza ya kuvwanda na mwana!"

¹³⁹ Mu tubaka, "Yehowa ya nene fikaka kento mosi na kivudi, mutindu profete tubaka ti Yandi ke sala yawu, mpe salaka cellule ya Menga. Mpe na nzila ya cellule ya Menga yina kisika basikaka nzutu ya Klisto.

¹⁴⁰ “Beno tala, na Ngwisani ya Ntama, Rabbin,” mu tubaka, “ntangu muntu kwendaka pesa dikabu, yandi bakaka mwana-dimeme. Yandi zabaka ti yandi bukaka misiku ya Nzambi, na yawu yandi bakaka mwana-dimeme. Yandi ndimaka masumu ya yandi, mpe mwana-dimeme yayi kufwaka. Na ntangu... maboko ya yandi vwandaka na zulu ya mwana-dimeme; samu na kundima ti yandi zabaka ti yandi zolaka kufwa samu na disumu ya yandi, kasi mwana-dimeme bakaka kisika ya yandi. Mpe cellule ya menga zenganaka; mpe yandi simbaka mwana-dimeme ya fioti na diboko ya yandi tii kuna yandi ke kuwa mwa luzingu ya yandi me bika yandi, mpe yawu ke lemba. Na yawu nganga-Nzambi, ya kieleka, losaka menga na zulu—na zulu ya tiya, diziku ya kisengo ya lusambusu.”

¹⁴¹ Na yawu mu tubaka, “Muntu yango, na yawu, yandi vwandaka basika kuna, na kuzabaka ti mwana-dimeme bakaka kisika ya yandi, kasi yandi vwandaka basika kuna na nsatu yina yandi vwandaka na yawu na ntangu yandi kotaka kuna, beno me mona, samu yawu lendaka katula disumu ve. Beno me mona? Kasi, na yawu, na diambu yayi, ‘Na ntangu ba me katula mvindu na musambidi, yandi ke vwanda diaka ve na konsiansi ya disumu.’ Kuna, ya vwandaka na dikabu yina ba vwandaka sala konso mvula. Kasi,” mu tubaka, “ntangu yayi na mbala yayi, ‘na ntangu ba me katula mvindu na musambidi, yandi ke vwanda diaka ve na konsiansi ya disumu.’ Samu... .

¹⁴² “Tala, Rabbin. Na hemoglobin, mwa luzingu yina ke bandaka na kati ya cellule, yawu ke katukaka na nkuna ya bakala, yawu ke kotaka na kento. Mpe yandi butaka diki; kasi, nsusu ya kento lenda buta diki, kasi kana ya kutanaka na nsusu ya bakala ve, yawu ke pasuka ata fioti ve.”

¹⁴³ Mpe mu tubaka, “Na yawu Nzambi ya kulutila nene, yina me fulusa ntangu mpe bisika nionso, kumaka mwa nkuna mosi ya fioti na kivumu ya kento.” Na yawu mu tubaka, “Ntangu beto me vuluka bubu yayi... Yesu vwandaka Juif ve to Muntu ya makanda ve, samu diki butaka kaka nzutu. Menga vwandaka na Luzingu. Na yawu beto—beto kele... Biblia me tuba, ‘Beto me vuluka na Menga ya Nzambi.’ Na yawu, Yandi vwandaka Juif ve to Muntu ya makanda ve; Yandi vwandaka Nzambi. Na yina, ntangu beto ke kwisaka na diziku mpe beto ke tulaka maboko ya beto, na lukwikilu, na zulu ya Yintu ya Yandi, mpe beto ke waka kiadi mpe mpasi ya Calvaire, mpe beto ke ndima masumu ya beto, ti beto me sala yimbi, mpe Yandi fwaka na kisika ya beto!

¹⁴⁴ “Na yawu, beno me mona,” mu tubaka, “menga ya mwana-dimeme yina lendaka vutuka ve na zulu ya yandi, menga yina... Cellule pasukaka, mpe luzingu yina vwandaka yina basikaka, na kupasuka ya cellule yayi ya menga ya mwana-dimeme, lendaka vutuka ve na zulu ya musambidi, samu yawu vwandaka luzingu ya niama, mpe yawu lendaka fwanana na luzingu ya muntu ve.

¹⁴⁵ “Kasi na ntangu yayi, ntangu cellule ya Menga yina kupasukaka, yawu vwandaka kaka muntu ve. Yina vwandaka Luzingu ya Nzambi, yina basikaka. Mpe ntangu musambidi me tetika maboko ya yandi, na lukwikilu, na zulu ya Mwana ya Nzambi, mpe yandi me ndima masumu ya yandi, luzingu ya muntu yankaka ve, kasi Luzingu ya Nzambi ke vutuka na muntu yayi, yina ke Luzingu ya Kukonda nsuka. Mpova yayi Zoe, yina zola tuba, ‘Luzingu ya Nzambi Yandi mosi.’ Mpe Yandi tubaka ti Yandi ke pesa beto Zoe, Luzingu ya Kukonda nsuka, mpe ntangu yayi beto kele bana-babakala mpe bana-bakento ya Nzambi. Yawu yina.”

¹⁴⁶ Mu tubaka, “Ntangu yayi yinki yawu kele? Yawu kele Nzambi, ke kukikulumusa. Yandi kwisaka, ntete; ‘muntu mosi ve lendaka simba Yandi,’ samu muntu kusumukaka. Na manima Yandi kulumukaka na nzutu mosi, ‘samu na kumeka disumu... samu na kubaka disumu.’ Beno me mona, Yandi, kima mosi kaka yina Nzambi lendaka kusala, samu na kuvwanda ya kusungama, ya vwandaka kusala yawu na mutindu yina.”

¹⁴⁷ Mutindu, yinki zolaka salama kana mu vwandaka na luyalu na zulu ya bantu yayi na suka yayi, mutindu yina Nzambi vwandaka na yawu na zulu ya bantu, mpe mu tubaka, “Muntu ya ntete yina ke tala dikunzi yayi, yandi ke kufwa,” mpe Tommy Hicks kutala yawu? Ntangu yayi, mutindu, mu baka Carl-... “Mpangi Carlson, nge ke kufwa samu na yandi.” Yina ke vwandaka mbote ve. Mu ke tuba, “Leo, nge ke secrétaire ya munu; nge ke kufwa samu na yandi.” Yina ke vwandaka mbote ve. “Billy Paul, mwana ya munu, nge kufwa samu na yandi.” Yina kele mbote ve. Mutindu mosi kaka samu na munu na kuvwanda ya kusungama, kele kubaka kisika ya yandi munu mosi.

¹⁴⁸ Mpe yawu yina Nzambi salaka. Yandi, Nzambi, kele Mpeve. Mpe Yandi salaka... Yandi, Yandi sobaka kisalu ya Yandi. Ya lenda vwandaka ya ngitukulu, samu na bantu, na kubanza na Yehowa mwana ya fioti. Yandi fwanaka kwisa, mutindu bakala ya kukula, kasi Yandi kwisaka na kidikilu, na zulu ya matufi ya baniam. Yehowa mwana ya fioti, ke dila mutindu bébé. Yehowa mwana ya fioti, ke sakana mutindu mwana-bakala mosi. Yehowa mwana ya fioti, musadi ya mabaya, mutindu musadi. Yehowa mwana ya fioti, ntwenia. Yehowa, ba me tula kati-kati ya zulu na ntoto, na mate ya binwa-malafu mpe kosu-kosu ya basoda na kizizi ya Yandi. Yehowa, kufwa samu na bana ya Yandi. Yehowa, kufwa, samu na kuvulusa; muntu yankaka ve, kasi Nzambi Yandi mosi! Beno me mona, Nzambi, yina vwandaka kisalu ya Yandi. Samu na yinki? Yandi ke na kumeka na kuvutuka na ntima ya bantu.

¹⁴⁹ Ntangu yayi, beto lendaka simba Yandi ve, *Kuna. Awa*, beto me simba Yandi na maboko ya beto. Ntangu yayi yinki Yandi salaka, na nzila ya dikabu ya nzutu yina? Yandi kumaka Yehowa *na kati* ya beto. Beto ke bitini ya Yandi. Na Kilumbu

ya Pantecote, Dikunzi ya Tiya kabwanaka Yawu mosi, mpe baludimi ya tiya tentamaka na zulu ya konso muntu, samu na kutalisa ti Nzambi me kukikabisa Yandi mosi na kati ya Dibuundu ya Yandi.

¹⁵⁰ Na yawu, bampangi, kana beto lenda vukana kaka kintwadi, mpe kuvukisa Yawu! Na yawu beto ke na Yehowa ya kufuluka, ntangu beto ke vukanaka kintwadi. Kasi wapi mutindu beto lenda sala yawu, kana *yayi* ke na kutuba na bandinga ya malumalu mpe ya ke na mbotika, *yayi*; na manima beto keba ludimi *yayi* ya Tiya awa, mpe *yayi*? Beto vukisa Yawu kintwadi.

¹⁵¹ Ntangu Nzambi, na Kilumbu ya Pantekote, kulumukaka, mpe Biblia me tuba, “Baludimi ya Tiya kulumukaka na zulu ya bawu nionso.” Mpe bawu . . . “Baludimi, ya kufwanana na Tiya,” baludimi. Yawu vwandaka Dikunzi ya Tiya yina kukabwanaka Yawu mosi mpe kukikabisaka Yawu mosi, na kati ya bantu, samu beto vwanda bampangi. “Kilumbu yina beno ke zaba ti Mu kele na kati ya Tata, Tata na kati ya Munu; Munu na kati ya Munu, mpe beno na kati ya Munu.” Mpe, beto, beto kele mosi. Beto kele mosi, beto kele ya kukabwana ve.

¹⁵² Ntangu yayi, Yehowa Nzambi, na zulu *Awa*, lendaka simba bantu ve, samu na musiku ya Yandi Mosi ya busantu; Yehowa Nzambi kumaka disumu samu na beto, mpe futaka ntalu; samu Yehowa Nzambi yina mosi kukwisa mpe kuzingga *na kati* ya beto. Nzambi *na zulu* ya beto; Nzambi *na beto*; Nzambi *na kati* ya beto. Banzambi tatu ve; Nzambi mosi! Ba-professeur ke kumaka bilawu, samu na kumeka na kubakula Yawu. Yawu kele—yawu kele luzayikisu. Yawu fwana monisama na beno.

¹⁵³ Ntangu yayi, ntangu yayi, samu na yina me tala mbotika, ntangu yayi, bantu mingi . . . Ntangu yayi, beno fwana sala yawu, bampangi. To, ya ke mutindu mu tubaka na Mpangi Scism mpe na Mpangi Ness, ti kana nge . . . Kuswana kubandaka. Mpe muntu nionso, mingi na kati ya beno bantu ya mayele awa kele na makuki ya kulutila munu; kasi mu me longuka mingi dilongi yango. Mpe mu tangaka *Batata Ya Ntete Ya Nicée*, *Concile ya Nicée*, mpe bantu nionso ya masolo, mpe nionso yina.

¹⁵⁴ Ba tubilaka diambu yina na Concile ya Nicée. Na balweka nionso zole butaka diambu ya mbote ve; ntangu dibuundu ya Katolika bakaka lweka ya ba-trinitaire yina me luta ndilu, mpe yina yankaka kwendaka na ba-unitaire, mpe bandambu nionso zole kwendaka na lweka. Ya kieleka mpenza, samu ti bantu vwandaka na kima ya kusala na kati ya yawu.

¹⁵⁵ Beno fwana bika Nzambi kusala yawu, beto ke na nsatu ya kubakula yawu ve. Beto vwanda bampangi. Beto kwenda kaka na ntwala mpe beto bika Nzambi kusala diambu yina Yandi ke sala. Kana Yandi kele ya seko mpe zaba mambu nionso, mpe zabisaka nsuka kubanda na mbatukulu, wapi mutindu beto lenda sala kima mosi samu na yawu? Beno kwenda kaka na

ntwala. Tala mutindu ya kusala. Beno tatamana na ndiatulu yina, mutindu mu tubaka mazono na nkokila, na Josué ya beto ya nene.

¹⁵⁶ Beno tala ntangu yayi, kana Banzambi kele tatu . . . Mu zola talisa na beno mutindu yawu kele ya kukondwa mfunu. Kana Banzambi kele tatu, na yawu Yesu vwandaka Yandi Mosi Ta- . . . Yesu lendaka vwanda ve Yandi Mosi Tata, na kuvwandaka mosi. Mpe, kana kele na tatu, Yandi butukaka lubutuku ya bumwense ve. Ntangu yayi bantu yikwa . . . ? Mu ke tuba ti *yayi* kele Nzambi Tata; mpe *yayi* kele Nzambi Mwana; mpe *yayi* kele Nzambi Mpeve-Santu.

¹⁵⁷ Ntangu yayi, samu na beno bampangi ya mutindu na mutindu awa, beno tala fioti diambu yayi mbote mpe beno ke mona yina mu ke na kumeka na katalisa. Mu ke sambila ti Nzambi katalisa beno yawu. Ntangu yayi, beno tala, beno zole ke kwikilaka mutindu mosi, kasi diabulu me kota na kati ya beno mpe yandi me kabisa beno samu na diambu yango. Ya ke kaka mutindu mosi, mpe mu ke siamisa yawu na beno, na nzila ya lusadusu ya Nzambi, mpe na Biblia ya Nzambi. Kana ya kele Biblia ve, na yawu beno ndima yawu ve. Ya kieleka.

¹⁵⁸ Kasi beno tala ntangu yayi. *Yayi* kele (yinki?) Nzambi Tata; *yayi* kele Nzambi Mwana; *yayi* kele Nzambi Mpeve-Santu. Mbote, ntangu yayi, beto telema mwa fioti ntangu yayi, beto tula bima yina tatu kuna; Nzambi Tata, Mwana, na Mpeve-Santu.

¹⁵⁹ Oh, mu—mu ke vwanda na ntangu ve samu na kusala yayi. Munu . . . [Bampangi me tuba, “Kwenda na ntwala! Kwenda na ntwala!”—Mu.] Kasi, beno me mona, mbote, mu ke sala kieleka nswalu. Beno lemvokila munu, bampangi ya munu, kasi mu—mu—mu me zwaka ntangu ya mbote ya kusolula na beno ata fioti ve, mpe mu—mu zola sala yawu.

¹⁶⁰ Na yawu, beno tala; Nzambi Tata, Mwana, Mpeve-Santu. Ntangu yayi, Nani vwandaka Tata ya Yesu Klisto? Nzambi vwandaka Tata ya Yesu Klisto. Beto nionso ke kwikilaka yawu. Mutindu yina ve? [Dibuundu me tuba, “Amen.”—Mu.] Mbote mingi.

¹⁶¹ Ntangu yayi, kana beto baka Matthieu 28:19, ntangu Yesu tubaka, “Beno kwenda bisika nionso, beno longa na bayinsi nionso, beno botika bawu na Nkumbu ya Tata, Mwana, Mpeve-Santu,” bilumbu kumi na ntwala, Pierre tubaka, “Beno balula bantima, mpe beno botama na Nkumbu ya Mfumu Yesu Klisto.” Ya ke na kuswaswana kisika mosi kuna. Ntangu yayi, beto meka ve . . . ya ke na . . .

¹⁶² Muntu nionso me pesaka kimbangi, mpe nionso yina. Yawu yayi. Lukwikilu ya munu yawu yayi, mpe mu ke talisa yawu pwelele na ntwala ya beno, bampangi. Mu ke tubaka yawu na manima ya ba-chaire ve; ya me tala beno. Kasi mu zola talisa

na beno yina mu ke monaka na balweka nionso zole, na yawu Mpeve-Santu ke monisa yawu pwelele na beno, beno me mona.

¹⁶³ Ntangu yayi, Matthieu 28:19, mpe kana—kana Matthieu 28:19 me swaswana na Actes 2:38, na yawu ya ke na kuswaswana na kati ya Biblia, mpe Ya ke na mfunu ve ya papié yina ba me sonikila Yawu ve.

¹⁶⁴ Ntangu yayi kana beno tala mbote na Matthieu kapu 16, Yesu pesaka na Pierre luzayikisu, mpe pesaka yandi bafungula.

¹⁶⁵ Ntangu yayi, beno bambuka moyo, Biblia me monisama na nzila ya théologie ya manaka yina bantu me sala ve. Ya ke mutindu yina ve. Ya kele luzayikisu.

¹⁶⁶ Yawu vwandaka luzayikisu, na kubanda. Samu na yinki Abel pesaka na Nzambi munkayulu ya kitoko mingi kulutila Cain? “Yawu monisamaka na yandi,” ti ya vwandaka bambuma ya péche, mpe ba-pomme, mpe malala, mpe ba-pomme. Kana ba-pomme ke sala ti bakento kuzaba ti bawu kele kinkonga, kulutila mbote beto lutisa diaka ba-pomme, mpangi-bakala. Beno ke banza mutindu yina ve? Ntangu yayi, yayi, yayi ke wakana mutindu mafingu, kasi mu zola tuba mutindu yina ve. Kasi, yawu vwandaka ba-pomme ve. Ve, tata. Ntangu yayi, mpe kana ya ke mutindu yina, na yawu, “Ya kumonisamaka na Abel,” ti yandi vwandaka menga ya tata ya yandi. Na yawu yandi pesaka diakabu ya menga, samu yawu vwandaka luzayikisu. Diambu ya muvimbwa me tungama na zulu ya yawu.

¹⁶⁷ Beno tala ntangu yayi, kiboba ya bakala-mbisi yina me zaba ata kima ve, yina me longukaka mingi ve... Biblia me tuba ti yandi vwandaka muntu yina me zaba kima ve mpe yina me longukaka ve. Kasi yandi vwandaka kuna, mpe Yesu yufulaka kiuvu ti, “Nani beno ke tuba ti Munu Mwana ya muntu kele?”

¹⁶⁸ Mosi tubaka, “Mpamba ve, Nge kele—Nge kele Moi-...” To, “Bawu—bawu tubaka, ‘Nge kele Moise.’”

“Nani, bawu ke tuba ti Mu kele?”

Mosi tubaka, “Mpamba ve, Nge kele Jérémie to baprofete, mpe *yayi, yina*, to *yankaka*.”

¹⁶⁹ Yandi tubaka, “Kiuvu yawu yina ve. Mu me yufula *beno*. Nani beno ke tuba ti Mu kele?”

¹⁷⁰ Mpe Pierre vwandaka na keti-keti ve, mpe yandi tubaka, “Nge kele Mwana ya Nzambi.”

¹⁷¹ Mpe Yandi tubaka, “Nge kele ya kusakumuka, Simon, mwana ya Jonas.” Beno tala ntangu yayi. “Ya ke nzutu na menga ve me monisa yawu na nge, kasi Tata ya Munu yina kele na Zulu.” Beno me mona?

¹⁷² Beno tala ntangu yayi, ntangu yayi, dibuundu ya Catholique ke tubaka ti Yandi tungaka Dibuundu na zulu ya Pierre. Yina kele luvunu.

¹⁷³ Dibuundu ya ba-protestant ke tubaka, “Yandi tungaka Yawu na zulu ya Yandi mosi.” Kasi beno tala ntangu yayi samu na kuzaba, samu na kumona kana ya kele mutindu yina.

¹⁷⁴ Yandi tungaka Yawu na zulu ya luzayikisu ya kimpeve ya Yina Yandi vwandaka, beno me mona, samu Yandi tubaka, “Nge kele ya kusakumuka, Simon, mwana ya Jonas. Ya ke menga mpe nzutu ve me monisa yawu na nge. Mu ke tuba nge kele Simon; na zulu ya ditadi yayi” (wapi ditadi? luzayikisu) “Mu ke tunga Dibuundu ya Munu, mpe mielo ya difelo lenda ve kumwangisa Yawu.”

¹⁷⁵ Na yawu, ntangu Pierre vwandaka kuna ntangu ba vwandaka zonzila Matthieu 28, mpe yandi vutukaka mpe, bilumbu kumi na manima, na luzayikisu yina, mpe botikaka na Nkumbu ya “Mfumu Yesu Klisto.” Samu na yinki yandi salaka yawu? Na luzayikisu ya Nzambi; mpe ya vwandaka na bafungula ya Kimfumu, mpangi-bakala.

¹⁷⁶ Ntangu yayi mu zola nióngisa beno fioti, na lweka mosi na kati ya beno, kasi beno vingila fioti. Ya ke na kisika mosi ve na kati ya Biblia kisika ba botikaka muntu mosi na Nkumbu ya “Tata, Mwana, Mpeve-Santu.” Ya ke na kisika mosi ve na kati ya Masonuku. Mpe kana ya kele, beno basisa yawu. Mpe kana beno lenda mona konso kisika yina na kati ya masolo ya santu, tii na kusalama ya dibiundu ya Katolika, mu zola ti beno basisa yawu. Ya ke na kisika mosi ve, ntangu yayi, mpe ya ke ya kieleka.

Kasi ntangu yayi beno vingila fioti, beno ba-Unitaire, kaka sekonde mosi.

¹⁷⁷ Ntangu yayi, ya ke na kisika mosi ve... Kana muntu mosi lenda talisa na munu kitini mosi ya Masonuku kisika ba salaka nkinzi yina na kati ya Biblia, ya “Tata, Mwana, Mpeve-Santu,” beno fwana kwisa tuba na munu kisika ba botikaka muntu mosi mutindu yina.

¹⁷⁸ Mpe bayankaka na kati ya bawu tubaka, “Mbote, mu ke baka yina Yesu tubaka, mu ke baka ve yina Pierre tubaka.” Kana bawu vwandaka ya kuswaswana, mosi na yankaka, yinki beto ke sala? Kana nionso ke ya Nzambi ve, yinki kitini ya Biblia kele ya kusungama?

¹⁷⁹ Nionso fwana kwelana mpe kuvukana, mpe kaka luzayikisu ya Nzambi. Balukolo ya beto ke longa yawu ata fioti ve. Ya kele luzayikisu, ti beno fwana mona Yawu.

¹⁸⁰ Na yawu, kana bantu yina zole vwandaka ya kuswaswana, mosi na yankaka, na yawu wapi mutindu ya Biblia beto ke tangaka? Wapi mutindu mu ke zaba kana Jean 14 kele ya kusungama, to ve? Wapi mutindu mu ke zaba kana Jean 3 kele ya kusungama, to ve? Wapi mutindu, wapi mutindu, wapi mutindu mu ke zaba? Beno me mona?

¹⁸¹ Kasi mutindu mosi kaka mu lenda vwanda na lukwikilu na Nzambi, kele kuzaba ti Biblia yina kele ya kusungama, mpe kukwikila ti Ya ke ya kusungama, mpe kukangama na Yawu. Ata ti mu ke bakula Yawu ve, mu ke sadila Yawu, na mutindu nionso.

¹⁸² Kasi ntangu bakuswaswana yayi ke kwisa, na yawu mu ke kwenda na ntwala ya Nzambi, samu na kuzaba. Mpe Wanzio mosi yina kukutanaka na munu na lukutakanu, mpe na nkokila, Yandi yina Mosi kulongaka munu Yayi. Beno me mona? Ntangu yayi kana ya kele yayi, wapi mutindu ya kele na ntangu yayi.

¹⁸³ Ntangu yayi, Matthieu 28:19, beto landa na bukebi na mwa ntangu fioti ntangu yayi. Mpe ntangu yayi mu ke baka Actes 2:38 awa kaka, kisika Pierre me tuba, “Mfumu Yesu Klisto.” Mpe Matthieu me tuba, “Tata, Mwana, Mpeve-Santu.”

¹⁸⁴ Beno kuwa ntangu yayi. Yandi tubaka, “Beno botika bawu...” Ya kele ve “na nkumbu ya Tata, na nkumbu ya Mwana, na nkumbu ya Mpeve-Santu.” Yandi tubaka ata fioti ve mutindu yina. Ya kele na “nkumbu...na nkumbu...na nkumbu.”

¹⁸⁵ Yandi tubaka ata fioti ve, “Beno botika bawu na *bankumbu* ya Tata, Mwana, mpe Mpeve-Santu,” samu ya ke ata na mfunu ve.

¹⁸⁶ Yandi tubaka, “Beno botika bawu na Nkumbu (N-k-u-m-b-u) ya Tata, Mwana, mpe Mpeve-Santu.” Ya kele kieleka? “...ya Tata, Mwana, na Mpeve-Santu,” conjunction, “mpe, mpe, mpe.”

¹⁸⁷ Ya kele ve *bankumbu*. Ya kele ve “na nkumbu ya Tata, nkumbu ya Mwana, nkumbu ya Mpeve-Santu.” Ya kele ve, “na *bankumbu* ya Tata, Mwana, mpe Mpeve-Santu.” Kasi, “na Nkumbu,” N-k-u-m-b-u, na bumosi, “ya Tata, Mwana, mpe Mpeve-Santu.” Ntangu yayi, yinki nkumbu yina na kati ya yawu ba lenda botika na yawu? Yawu kele Nkumbu mosi. Yinki yawu kele? “Tata” kele nkumbu ya kieleka, to “Mwana” kele nkumbu ya kieleka, to “Mpeve-Santu” kele nkumbu ya kieleka?

¹⁸⁸ Ya kele “Nkumbu”, kisika mosi. Ya kele kieleka? [Dibuundu me tuba, “Amen.”—Mu.] Mbote, ntangu yayi mu zola kuyufula beno kima mosi, ntangu yayi. Kana “Nkumbu,” na yawu, kana Yesu tubaka, “Beno botika na Nkumbu ya Tata, Mwana, mpe Mpeve...” Bantu yikwa ke kwikila ti Yesu tubaka mutindu yina? “[Amen.]” Ya kele Masonuku. Ya kele Matthieu 28:19, “Na Nkumbu ya Tata, Mwana...”

¹⁸⁹ [Mpangi Branham me mona kima mosi me benda bukebi na Iweka—Mu.] Ya kele na kima yina beto...Ve, ya kele, mu vwandaka me banza... Mbote mingi, tata. [Mpangi-bakala mosi me tuba, “Lemvokila munu, Mpangi Branham?”] Inga. [“Mu zola vutula bande yayi kuna, mpe mu zola kondwa yawu ve.”] Mbote mingi. [Kisika ya mpamba na bande.]...?...

¹⁹⁰ Ntangu yayi, “na Nkumbu ya Tata, Mwana, mpe Mpeve-Santu.” Beno kuwa ntangu yayi, bampangi. Ya kele na kima ya mutindu ve nkumbu ya “Tata,” samu *Tata* kele nkumbu ve. Ya kele kisalu. Ya kele na kima ya mutindu ve nkumbu ya “Mwana,” samu *Mwana* kele kisalu. Ya kele na kima ya mutindu ve nkumbu ya “Mpeve-Santu.” Yawu yina Yandi kele.

¹⁹¹ Mu vwandaka tubila yawu na madia ya suka ya balongi na suka mosi, mpe kento mosi... Na nganda ya ndonga, ya kieleka, muntu nionso lenda telemisa, diambu ya mutindu yina. Yandi tubaka, “Vingila fioti! Lemvokila munu!” Yandi tubaka, “Mpeve-Santu kele nkumbu.”

¹⁹² Mu tubaka, “Ya kele yina Yawu kele. Mu ke muntu, kasi nkumbu ya munu kele ve ‘Muntu.’”

¹⁹³ Ya kele Mpeve-Santu. Yina kele nkumbu ve. Ya kele yina Yawu kele. Ya kele nkumbu ya kimvuka, ya kieleka, kasi yawu kele ve... Ya ke—ya ke... Yawu kele nkumbu ve.

¹⁹⁴ Ntangu yayi, kana Yandi tubaka, “Beno botika bawu na Nkumbu ya Tata, mpe ya Mwana, mpe ya Mpeve-Santu,” mpe Tata, to Mwana, to Mpeve-Santu ya kele nkumbu, na yawu yinki kele Nkumbu yango? Beto zola zaba yawu.

¹⁹⁵ Ntangu yayi, beto lenda tula yawu nionso na kisika mosi awa, kana beno ke landa na bukebi mpe—mpe—mpe kusadila mwa ntangu ntangu yayi, to kukeba fioti ntangu, mu zola tuba. Ntangu yayi beno tala Matthieu 28:19. Ntangu yayi, mu ke tuba ve ti...

¹⁹⁶ Ntangu yankaka, mbala yankaka beno me salaka yawu, bayankaka na kati ya beno bampangi-bakento to bampangi-babakala. Mbala yankaka nge me lokutaka buku mosi, kilumbu mosi, mpe nge talaka na nsuka na yawu mpe ya tubaka, “Jean na Marie zingaka na kiese kubanda ntangu yina.” Mbote, nani kele Jean mpe Marie? Yinki kele... nani kele Jean na Marie yina zingaka na kiese kubanda ntangu yina? Ya kele na mutindu kaka mosi yina beno samu lenda zaba nani Jean na Marie kele; ti, kana ya ke mansweki samu na nge, vutuka mpe tanga buku yango. Ya ke kieleka? Vutuka na mbatukulu mpe tanga yawu tii na nsuka, mpe ya ke tuba na nge nani kele Jean na Marie.

¹⁹⁷ Mbote, kana Yesu tubaka, Yesu Klisto Mwana ya Nzambi, yina tubaka, “Beno kwenda bisika nionso, beno longa na bayinsi nionso, beno botika bawu na Nkumbu ya Tata, Mwana, mpe Mpeve-Santu,” to *Tata*, *Mwana*, to *Mpeve-Santu* kele nkumbu mosi, na yawu, kana ya ke mansweki, kulutila mbote beto vutuka na mbatukulu ya Buku.

¹⁹⁸ Ntangu yayi beto vutuka na kikapu ya 1 ya Matthieu, mpe beto banda kuna, yawu ke pesa mabuta, tii ya ke kuma na nzila ya 18.

¹⁹⁹ Beno tala ntangu yayi, beno tala mwa fioti. *Yayi* ke Tata, na diboko ya munu ya kibakala; *yayi* na kati-kati kele Mwana; mpe *yayi* kele Mpeve-Santu. Ntangu yayi, *yayi* kele Tata ya Yesu Klisto. Ya ke mutindu yina? Nzambi kele Tata ya Yesu Klisto. Beto nionso ke kwikila yawu? [Dibuundu me tuba, “Amen.”—Mu.] Mbote mingi.

²⁰⁰ Ntangu yayi Matthieu 1:18 me tuba:

Ntangu yayi Yesu Klisto butukaka mutindu yayi: Ntangu... mama ya yandi Marie kuzwaka nsilulu ya makwela na Joseph, na ntwala yandi... bawu zinga kintwadi, yandi vwandaka me kuma na kivumu na ngolo ya... [Dibuundu me tuba, “Mpeve-Santu.”—Mu.]

²⁰¹ Mu banzaka ti Nzambi vwandaka Tata ya Yandi.

Mpe yandi ke buta mwana ya bakala... ba ke bokila yandi YESU:...

Mpe Joseph bakala ya yandi, vwandaka muntu ya mbote, ... yandi zolaka ve na kumonisa yandi nsoni na meso ya bantu, kasi yandi bakaka lukana ya kubikisa yandi nakinsweki.

Na yina, *ntangu yandi vwandaka banza mambu yina, tala, wanzio mosi ya Mfumu monanaka na yandi na ndosi, mpe tubaka, Joseph, nge mwana ya David, kumona boma ve na kukwela Marie kento ya nge: samu ti yandi me kuzwa kivumu na ngolo ya... [Dibuundu me tuba, “Mpeve-Santu.”—Mu.]*

²⁰² Mu banzaka ti Nzambi vwandaka Tata ya Yandi. Ntangu yayi, bampangi, Yandi vwandaka na batata zole? [“Ve.”] Yandi lendaka ve. Kana Yandi vwandaka, Yandi vwandaka mwana ya makangu, mpe wapi mutindu ya lukwikilu beto zolaka vwanda na yawu? Beno fwana ndima ti Nzambi Tata na Mpeve-Santu kele Mpeve mosi kaka. Ya kieleka, Ya ke mutindu yina. Ya kieleka, Ya ke Mpeve mosi kaka. Ntangu yayi, na yina, beto me mona yawu.

Mpe yandi ke buta mwana ya bakala, mpe ba ke bokila yandi YESU: na yawu yandi ke vulusa bantu ya yandi na masumu ya bawu.

...mambu nionso yayi me salama, samu na kulungisa...

²⁰³ Mu ke na kutanga Masonuku. Beno balongi beno zaba yawu, na yina mu ke na kulanda.

...samu na kulungisa... zabisaka profete, na nzila ya Mfumu, yandi tubaka,

...mwense mosi ke kuzwa kivumu, mpe... yandi ke buta mwana, mpe ba ke bokila yandi Emmanuel,

yayi zola kutuba, . . . [Dibuundu me tuba, “Nzambi na beto.”—Mu.]

²⁰⁴ “Nzambi na beto!” Ya kele mutindu yina?

²⁰⁵ Na yawu yinki kele Nkumbu ya Tata, Mwana, mpe Mpeve-Santu? [Mpangi-bakala mosi me tuba, “Yesu Klisto.”—Mu.] Mbote, ya kieleka. Kikuma yawu yina Pierre botikaka bawu na Nkumbu ya “Yesu Klisto.”

²⁰⁶ Kasi, mu ke kipe ve, kana ba me botikaka beno na nkumbu ya Rose ya Sharon, Felele ya Lubwaku, Mbwetete ya Suka, yina kele bisalu, mpe. Kana ntima ya beno kele ya kusungama na ntwala ya Nzambi, Yandi zaba ntima ya beno.

²⁰⁷ Kasi ntangu yayi, ntangu yayi, mu me tuba yawu. Ntangu yayi, ntangu yayi mu me tuba . . . Ntangu yayi Mpangi Scism tubaka, “Ntangu yayi!” Mpamba ve, ya kieleka, yina ke monana mutindu ba-Unitaire, na yawu yandi vwandaka kieleka samu na yawu.

²⁰⁸ Ntangu yayi mu tubaka, “Ntangu yayi awa mu zola tuba kima mosi na beno ntangu yayi.” Beno me mona? Mu tubaka, “Ntangu yayi mu zola siamisa na beno ti, bantu yayi zole, me tuba kima mosi.”

²⁰⁹ Ntangu yayi, Matthieu tubaka, “Na Nkumbu ya Tata.” Ya kele mutindu yina? [Dibuundu me tuba, “Amen.”—Mu.] Mbote mingi. Mpe Pierre tubaka, “Na Nkumbu ya Mfumu.” Matthieu 28:19 me tuba, “Na Nkumbu ya Tata,” mpe Actes 2:38 me tuba, “Na Nkumbu ya Mfumu.” David tubaka, “MFUMU me tuba na Mfumu ya munu.” Nani Yawu vwandaka? Tata mpe Mfumu kele Nkumbu mosi. David tubaka, “MFUMU tubaka na Mfumu ya munu, ‘Vwanda na diboko ya Munu ya kibakala.’” Beno me mona, “Na Nkumbu ya Tata; na Nkumbu ya Mfumu.”

²¹⁰ Mpe Matthieu me tuba, “Na Nkumbu ya Mwana,” mpe Pierre tubaka, “Na Nkumbu ya Yesu.” Nani kele Mwana? Yesu.

²¹¹ “Na Nkumbu ya Mpeve-Santu,” ya vwandaka Matthieu; mpe Pierre tubaka, “Na Nkumbu ya Klisto,” Logos.

²¹² *Tata, Mwana, Mpeve-Santu*, “Mfumu Yesu Klisto.” Mpamba ve, ya ke ya kulunga mutindu ya lendaka vwanda. Beno me mona?

²¹³ Mpangi Scism tubaka na munu, to, Mpangi Scism, mpangi-bakala ya Unitaire, yandi tubaka, “Mpangi Branham, ya kele kieleka, kasi,” yandi tubaka, “yina ke mutindu *yayi*.”

²¹⁴ Mu tubaka, “Na yawu, yayi kele mutindu *yina*.” Ya kieleka. Beno me mona? Mu tubaka, “Kana yina kele mutindu *yayi*, yayi ke mutindu *yina*. Na yawu samu na yinki beno ke na kuswana?”

²¹⁵ Mu tubaka, “Beno bika mu tuba na beno diambu *yayi*, bampangi. Kana mu me botikaka muntu, tala *yina* . . . ”

²¹⁶ Mu tubaka, “Ntangu yayi, Docteur Ness yandi yayi.” Mpe beno . . . muntu mosi tubaka, na mwa ntangu fioti me luta, beno bampangi, ti beno me zaba Docteur Ness.

²¹⁷ Mbote, mu ke tuba, awa, Mpangi Hicks yayi, yandi ke na . . . Mu banza ti nge ke na Diplome ya Docteur. Mutindu yina? Mbote mingi.

²¹⁸ Ntangu yayi mu tubaka, “Kana Docteur Ness, kele awa . . .” Ntangu yayi mu tubaka, “Kana mu zolaka . . .” Ntangu yayi, ntangu mu ke nataka muntu na masa, samu na kubotika bawu, mu ke zikisa yawu kaka mutindu yandi salaka, mu tubaka, “Yina vwandaka bisalu yina me lunga na Nkumbu ya Yandi.”

²¹⁹ Mu tubaka, “Ntangu yayi, bampangi ya ba-Assemblée ke na kusadila bisalu, mpe bampangi ya ba-Unitaire ke na kusadila Nkumbu.” Mu tubaka, “Ntangu yayi mu ke siamisa na nge ti, beno zole kele na kyeta, mpe mu ke ya kusungama.” Beno zaba yinki mutindu beno fwana . . . Ntangu bantu ke bendana mutindu yina, beno fwana vwanda sekisa bawu fioti, samu na kukitisa bantima ya bawu. Na yawu mu tubaka, “Mu ke siamisa yawu na beno ti beno zole kele na kyeta, mpe mu ke ya kusungama.”

²²⁰ Mu tubaka, “Ntangu yayi yinki ke salama kana mu zolaka zitisa Mpangi Ness, mu zolaka tuba . . .”

²²¹ To, to, Mpangi Hicks awa, beno me mona. Mu ke tuba, “Hicks!” Ntangu yayi, yina ke sala mbote? Ve. Mbote, yinki ke salama kana mu ke tuba, “Docteur! Hé, Docteur! Yinki yina?” Ntangu yayi, yina ke luzitu ve, mutindu yina ve?

²²² “Ntangu,” mu tubaka, “ya ke mutindu yina beno bantu ya ba-Assemblée ke salaka, beno me mona. Ntangu beno bampangi ya ba-Assemblée ke tuba, ‘Na nkumbu ya Tata, mpe ya Mwana, Mpeve-Santu,’ nionso beno ke tuba, ‘na nkumbu ya révérend, docteur.’”

²²³ Mpe mu tubaka, “Na yawu, beno bampangi ya ba-Unitaire, ntangu beno ke botika, beno ke tuba, ‘Yesu!’” Ba ke sadilaka ve . . .

²²⁴ Bawu, bantu ya Yesu Kaka, ba ke sadilaka nkumbu “Yesu.” Ya ke na ba-Yesu mingi. Kasi, Ya kele Mfumu Yesu Klisto, beno me mona. Ya kele mingi . . . Kubotika na nkumbu ya “Yesu,” mu ke wisana na yawu ve; ya ke na Masonuku ve. Beno baka ya ntete, beno tala kana yawu kele ve “Mfumu Yesu Klisto.” Ya kieleka, Yandi ke Mfumu Yesu Klisto. Ya kele na ba-Yesu mingi, ya kieleka. Mpe Klisto kele “Muntu ya kukusa.”

²²⁵ Mu tubaka, “Ntangu yayi, kana mu vwandaka zola kutuba kima mutindu mosi na Mpangi Ness. Mu ke tuba, ya ke vwanda mbote kana mu tuba, ‘Hé, Ness!?’” Mu tubaka, “Ya kele mutindu yina beno ba-Unitaire lendaka tuba yawu. Beno me mona? Ya lendaka vwanda kukondwa luzitu na muntu yina me longukaka,

mpe yina ke Diplome ya Docteur? Kana yandi me longukaka mingi samu na yawu, beto fwana bokila yandi mutindu yina.”

²²⁶ Mpe mu tubaka, “Na yawu kana mu tubaka, ‘Hé, Docteur!’” Mu tubaka, “Yina ke nzonzolo ya nganzi, kana longi mosi me tuba na yankaka mutindu yina?” To, mu tubaka, “Ya kele kaka mutindu yina beno ke salaka yawu, kaka na lweka na nzila ya kisalu.”

²²⁷ Kasi mu tubaka, “Ntangu mu ke nataka muntu na masa, mu ke pusanaka kuna mpe mu ke yufula yandi, mpe mu ke tuba, mpe mu ke yufula yandi nkumbu ya yandi mpe nani yandi kele, mpe lukwikelu ya yandi.

²²⁸ “Na yawu mu ke sambila, mpe mu ke tuba, ‘Ntangu yayi, Tata, mutindu Nge tumaka beto na “kukwenda na yinza ya muvimba mpe beto sala bilandi na bayinsi nionso, . . .”” Beno bampangi zaba ti yina kele ya ntete, beno me mona. ““ . . . beno sala bilandi na bayinsi nionso, beno botika bawu na Nkumbu ya Tata, mpe ya Mwana, mpe ya Mpeve-Santu; beno longa bawu ti bawu zitisa mambu nionso yina Nge me . . . mambu nionso yina Nge me longa beto.””

²²⁹ “Na manima mu ke tuba, ‘Na kulandila kundima ya lukwikelu ya nge; na kulandila kundima ya masumu ya nge, mpe lukwikelu ya nge na Mwana ya Nzambi, mu ke botika nge, mpangi ya munu ya luzolo, na Nkumbu ya Mfumu Yesu Klisto.’”

²³⁰ Mu tubaka, “Yina kele mutindu mu ke botikaka. Mu ke ndimaka mbala mosi bisalu ya Yandi, yina Yandi vwandaka, na mbala mosi Tata, Mwana, mpe Mpeve-Santu. Mpe kikuma Yesu tubaka mutindu yina, vwandaka . . .”

²³¹ Beno tala ntangu yayi. Kana—kana ya kele mutindu yina ve, kuswaswana kele na kati ya Masonuku ya beno; beno ke na kuswaswana. Mpe yinki beno ke sala ntangu . . . Yinki ke salama kana mpangi-bakala yayi ya Buddhiste lendaka telema mpe kutuba ti, “Yinki beno ke tuba samu na yayi?” Yinki ba ke tuba ntangu bawu tubaka na munu . . .

²³² Kuna, ntangu mpangi-bakala yayi ya Indien tulaka ntembe na Morris Reidhead, mpe tubaka na yandi, yandi tubaka, “Yinki beno ke tuba samu na Marc 16?” Yandi zolaka vutuka na manima samu na yawu.

²³³ Beno fwana benda nzutu samu na diambu mosi ve. Yina kele Ndinga ya Nzambi. Beno bikala na Yawu. Beno sambila kaka. Beno yamba luzayikisu. Ya kele mutindu mosi kubanda nsongi na nsongi.

²³⁴ Beno me mona, bawu zole ke tuba diambu yango, ntangu yayi; bisalu ve; na nzila mosi ve. Mu tubaka, “Ntangu yayi . . .”

²³⁵ Mu ndimaka Yandi. Yandi vwandaka Tata; Nzambi yankaka ve. Yandi vwandaka Mwana; Nzambi yankaka ve. Nzambi mosi kaka! Beno . . . Ya kele bisalu tatu. Nzambi na kisalu ya Butata,

kana beno zola bokila yawu, ya Butata; Bumwana; mpe ya kele Nzambi mosi na kati ya beto ntangu yayi, “Mu ke vwanda na beno.” “Munu,” kiyingilu kimuntu, “Mu ke vwanda na beno.” Na yawu, beno me mona, ya ke bisalu tatu, ya ke Banzambi tatu ve.

Ntangu yayi, mpangi-bakala, kana bilandi sadilaka yawu ata fioti ve, mpe nionso yina . . .

²³⁶ Mu ke tuba kima mosi ve samu na yawu. Ya kele mbote mingi. Mu ke tuba na beno, kana muntu mosi kukwisa awa, ti ba botikaka yandi na nkumbu ya “Rose ya Sharon, Felele ya Lubwaku, mpe Mbwetete ya Suka,” mpe yandi me kwikila Yesu Klisto mutindu Mvulusi ya yandi, mu ke tuba, “Nzambi sakumuna nge, mpangi-bakala! Kwenda na ntwala, beto kwenda!” Beno me mona? Ya kele mbote. Samu ti, kana ntima ya beno kele ya kusungama ve, beno kele ya kusungama ve, na mutindu nionso. Ya kele kieleka ya kulunga. Mpe ntima ya beno—ya beno fwana vwanda ya kusungama.

²³⁷ Mpe mu tubaka, “Beno tala ntangu yayi. Ntangu yayi, kana mu ke pesa mbote na Mpangi Ness awa, mu ke tuba ‘Révérend Docteur Ness.’ Ya kele kieleka. Yandi kele longi. Ba fwana zitisa yandi mutindu révérend. Yandi me longuka, mpe yandi me longuka mingi. Yandi ke na Diplome ya Docteur, na yawu ba fwana bokila yandi ‘docteur.’ Yina kele kisalu ya yandi, beno me mona. Kasi, mpe nkumbu ya yandi kele ‘Ness.’ Ntangu yayi, mu lendaka tuba ve, ‘Hé, Ness! Hé, Docteur!’ Ve, yina ke vwanda mbote ve. Mu ke tuba, ‘Révérend Docteur Ness.’

²³⁸ “Beno me mona, yina mu ke bokila, beno me mona, yina Yandi kele; na mbala mosi Tata, Mwana, mpe Mpeve-Santu, ‘Mfumu Yesu Klisto.’” Beno me mona?

²³⁹ Mpe mu tubaka, “Kana mu lendaka botika muntu mosi na mabuundu ya beno, ya kele mutindu yina mu ke botika bawu.” Mu tubaka, “Beno ke yamba yandi, Mpangi Ness?”

²⁴⁰ Yandi tubaka, “Ya kieleka. Yandi me botama na Nkumbu ya Tata, Mwana, mpe Mpeve-Santu.”

Mu tubaka, “Nge ke yamba yandi, Mpangi Scism?”

Yandi tubaka, “Ya kieleka, yandi me botama na Nkumbu ya Yesu.”

²⁴¹ Mu tubaka, “Na yawu wapi diambu kele na beno, bampangi? Samu na yinki beno ke ndima yawu ve, mpe kubwisa bibaka yayi kisika bantu yayi ya mputu kele . . . ? Ba-Unitaire ke zolaka, ya kieleka, bandimi ya mabuundu ya bawu, ba ke zolaka kusambilila na bantu ya ba-Assemblées. Mpe ba-Assemblée, dibuundu, ke zolaka kusambilila na ba-Unitaire. Mpe bampangi ke vwandaka mutindu yina. Ba ke vwandaka mutindu yina. Kasi kana diabulu lenda sala ti bawu nwana . . . ”

²⁴² Ntangu yayi beno me mona yina mu zola tuba, bampangi? Mu ke landa kaka kima mosi, Yesu Klisto, mpe kuvukana ya Nzutu ya Yesu Klisto. Yawu yina dikani ya munu.

²⁴³ Ntangu yayi, mu ke tubaka kima mosi ve samu na yawu, “Hé, ba me botikaka nge na Nkumbu ya Yesu ve; nge ke kwenda na difelo.” Ntangu yayi, yina ke buzoba.

²⁴⁴ Mu ke tuba na beno yina salamaka kilumbu yina. Mu vwandaka kuna na Texas. Na ntuala kukatuka... Mpe bampangi awa kele batemwe ya yawu. Dibuundu ya ba-Unitaire, mabuundu makumi sambwadi na zole, simbisaka lukutakanu ya munu. Mpe mu ke tula Mpangi Petty, mpangi-bakala ya Assemblée de Dieu, na kisika ya malongi na nkokila yina. Ntangu yayi, beno zaba ti ya kele ya kieleka. Yandi ke mpangi-bakala ya ntalu, Mpangi Petty, kana mosi na kati ya beno me zaba yandi, ya Beaumont, na Texas. Yandi ke mosi na kati ya bantu ya kulutila mbote yina mu me monaka ntete. Kento ya yandi kele mundimi ya Katolika, kieleka kento mosi ya santu. Yandi ke bakala ya kieleka ya Nzambi.

²⁴⁵ Beno tuba na munu nani kele muntu ya mbote mingi kulutila Roy Wead, ya ba-Assemblée de Dieu. Beno pesa munu nkumbu ya muntu mosi ya bantu yayi, beno tala awa, bampangi yayi nionso mu me zaba awa. Mpangi-bakala ya dibuundu ya Philadelphie awa, mpe bantu ya ba-Assemblée de Dieu, mpe ya ke na bantu ya kulutila mbote? Beno tuba na munu wapi. Beno tuba na munu nani kele muntu ya mbote kulutila Jack Moore? Beno tuba na munu yawu. Yandi kele yina ba ke bokilaka... Ba ke ya bawu. Yandi ke muntu ya misiku ve. Beno ke mona misiku na balweka nionso zole; mpe ya ke kisika yina bantu ke songaka musapi, mpe ya ke kisika yina diabulu ke songaka musapi.

²⁴⁶ Kasi bawu nionso kele bantu ya Nzambi. Nzambi me pesaka bawu Mpeve-Santu. Kana ya vwandaka ve samu na lemvo ya Nzambi, beto zolaka vwanda mpamba, na bakuswana ya beto mpe nionso yina. Ya kele kieleka ya kulunga. Kasi lemvo ya Nzambi ke vukisa beto kintwadi. Ata ti beto lenda yimbila, “Nsinga ya ngwisani kusakumuka yina ke vutukisa bantima ya beto kati na zola ya Klisto.” Tala yina beto ke na yawu nsatu, kasi.

²⁴⁷ Mpe na yawu beno zaba yawu? Surveillant Général ya dibuundu, bokilaka munu, mpe yandi tubaka, “Nge zaba yina nge salaka mazono na nkokila?” Mpimpa ya munu ya zole kuna.

Mu tubaka, “Yinki?” Mu tubaka, “Beto vwandaka na lukutakanu mosi ya kitoko.”

Yandi tubaka, “Nge bokilaka nsumuki mosi na chaire.”

Mu tubaka, “Mu zaba yawu ve.” Kisika vwandaka . . .

Yandi tubaka, “Ya kele Tata Petty.”

²⁴⁸ “Oh,” mu tubaka, “nsumuki? Yinki?” Mu tubaka, “Yandi ke longi ya Assemblée de Dieu, mpangi-bakala.”

²⁴⁹ Yandi tubaka, “Yinga, kasi yandi kele dyaka nsumuki, samu ba me botikaka yandi mbote ve.”

²⁵⁰ Mpe mu tubaka, “Mpangi-bakala, na lemvo ya nge tuba na munu samu na yinki.” Mu tubaka, “Yandi kele na Mpeve-Santu.”

²⁵¹ Yandi tubaka, “Mpangi Branham, yinki Pierre tubaka? ‘Beno balula bantima, mpe beno baka mbotika na Nkumbu ya Yesu Klisto samu na lemvo ya masumu ya beno.’ Na yina ba ke lemvokila beno masumu ve kana beno me baka mbotika na Nkumbu ya Yesu ve.”

Mu tubaka, “Yina ke salamaka mutindu yina, mpangi ya munu?”

Yandi tubaka, “Ya ke salamaka mutindu yina.”

²⁵² Mu tubaka, “Nzambi balulaka manaka ya Yandi Mosi kuna, na Actes 10:49, mpamba ve, ‘Ntangu Pierre vwandaka tuba bampova yayi, Mpeve-Santu kulumukaka na zulu bantu yina vwandaka kuwa Ndinga,’ beno me mona, mpe bawu bakaka mbotika ata fioti ve, na mutindu nionso. Na yawu, Nzambi pesaka Mpeve-Santu na bantu yina balulaka ata bantima ve?” Mu tubaka, “Wapi kisika na yinza nge me telema ntangu yayi?”

²⁵³ Yandi tubaka, “Beno zaba yina beto ke sala?” Yandi tubaka, “Beto ke sala mwa selekele, mpe beto ke tula nge na nganda ya selekele ya beto.”

²⁵⁴ “Na yawu,” mu tubaka, “Mu ke sala yankaka, mpe mu ke vutula beno diaka na kati.” Mu tubaka, “Beno lenda tula munu na nganda ve, samu mu ke zolaka beno. Beno me mona, beno lenda sala yawu ve.” Mu tubaka, “Ya ke na mingi ya bampangi ya beno—ya beno kuna yina ke zolaka munu mpe yina ke kwikilaka na munu.” Mu tubaka, “Beno, mu ke—mu ke . . . Ba ke kwisa, na mutindu nionso.” Mu tubaka, “Ba ke kwisa. Mpe beno lenda tula munu na nganda ve. Kana beno tula munu na nganda, mu ke vutula beno na kati.” Mu tubaka, “Ntangu beno ke sala selekele mosi, Nzambi, na lemvo ya Yandi, ke sala ti mu sala yankaka mpe mu ke vutula beno diaka na kati.” Ya kieleka, beno sala yankaka samu na kuvutula bawu diaka na kati.

²⁵⁵ Mpe, mpangi-bakala, oh, na Nkumbu ya Klisto bika mu tuba mutindu yayi. Mu—mu ke na . . . Mu zaba ti mu me baka ntangu mingi awa; mpe ya ke monana ti ya me kuma ntangu ya kusukisa, mu banza, kasi bika mu tuba kaka yayi, beno me mona.

²⁵⁶ Mpe mu tubaka na muntu yina, mu tubaka, “Mu ke tambula na nge kana nge ke longa Masonuku, mpe kuvwanda na zola, mpe kukwikila ti—ti . . . mpe nge ke longa mpe nge ke tuba ti nge ke botika bantu . . . na nkumbu ya ‘Yesu’ ve, Yesu kaka. Ve, tata. Mu—mu lenda wisana na yawu ve, samu mu zaba ba-Yesu mingi; mu zaba bawu na Afrika mpe bisika ya mutindu na mutindu,

bantu na nkumbu ya Yesu. Kasi kana nge ke sadila nkumbu ya ‘Mfumu ya beto Yesu Klisto,’ mu ke wisana na nge. Ya ke mbote mingi. Mu ke sadisa nge. Mu banza ti kana nge ke tula ‘Tata, Mwana, mpe Mpeve-Santu’ ntete, beno me mona, samu ya vwanda pwelele.” Mu tubaka, “Mu banza beno lenda sala mutindu yina.”

Kasi yandi tubaka, “Oh, ve, ve! Yina, ya kele kuvutuka na butatu.”

Mu tubaka, “Ya kele butatu ve. Ya kele Nzambi mosi na kati ya bisalu tatu.”

²⁵⁷ Ya ke butatu ve, Banzambi tatu. Beto ke na Banzambi tatu ve. Mutindu yina ve. Ya kele na diambu ya mutindu yina ve. Ba me longaka yawu na Biblia ve. Mpe ya kele kaka na Nzambi mosi. “Wa munu, O Israel, Mu ke Mfumu Nzambi ya nge.” Nzambi mosi! Musiku ya ntete, “Nge ke vwanda na banzambi yankaka ve na ntwala ya Munu.” Ya kieleka, Yandi kele Nzambi mosi, tatu ve.

²⁵⁸ Yina kele lubangulu ya Catholique; mpe yawu vwandaka, yawu katukaka na bantu ya Catholique mpe ya kwendaka na ba-Lutherien, mpe landilaka, mpe nionso yina, mpe bantu mingi me kuma kukwikila bubu yayi ti beto ke na Banzambi tatu.

²⁵⁹ Mpe ya ke kisika yina beno ke ata fioti ve... Nsangu yayi ya mbote ke kwenda na ba-Juif ata fioti ve... na yina, profesi yina mu pesaka na suka yina samu na missionnaire Juif yina kuna. Beno ke ndimisa ata fioti ve Nzambi ya butatu na Juif. Beno ke sala yawu ata fioti ve. Na yina, yandi kele ve; yandi me zaba yawu kulutila yina. Beno me mona, yandi zaba mingi samu na Biblia kulutila yina. Kasi Yandi ke Nzambi butatu ata fioti ve, samu na—samu na Juif. Kana beno nata yandi na kuzaba ti Ya kele Yehowa mosi yina, yandi ke ndima yawu na mbala mosi. Ya kieleka! Yawu yina, beno me mona.

²⁶⁰ Mpe mu ke kwikilaka nionso yayi. Mutindu Joseph tubaka, “Bampangi, beno kumidasukila ve, samu Nzambi me sala yayi,” beno me mona. Na yawu—na yawu kana diambu yango... Ya ke samu ti ya vingila tii na ntangu yayi, yimeni, samu nsungi ya beto ya Bantu ya makanda ke zola kukuma na nsuka. Ntangu yayi, mu ke kwikila yawu na ntima ya beto ya muvimbba. Na yawu beno me mona, bampangi ya munu? Mu ke na kumeka na kukuma na kima mosi, ti, kimvuka ya bantu yayi, ya bantu yina me baka mbotika ya Mpeve-Santu.

²⁶¹ Kimvuka ya Aimee McPherson, yinki ya salaka? Yandi vwandaka ntete Unitaire, mu banza; na yawu yandi basikaka mpe yandi kumaka muntu ya Assemblée; na yawu yandi basikaka mpe yandi salaka organisation na mutindu yankaka; awa ntama mingi ve, yandi kotisaka mwa kimvuka mosi, mwa kima mosi.

²⁶² Mu vwandaka ya kuvwanda na lukutakanu ya O. L. Jaggers. Ntangu yayi, beto nionso me zaba O. L. Jaggers. Tata ya yandi—ya yandi pesaka lusalusu samu na kubanda Concile Général ya ba-Assemblée de Dieu. Ntangu yayi, O. L. kele muntu ya nene. Yandi kele longi ya nene. Mu tubaka na yandi, ntama mingi ve, mu tubaka, “Mpangi Jaggers, kana mu lenda longa mutindu nge me sala yawu, kana mu ke kuzwaka dyaka ve vwandaka na lukutakanu ya kubeluka ya nzutu ata fioti ve.” Kasi yandi vwandaka na menga yayi nionso mpe vinu yayi, mpe nionso yina, ntangu yandi bandaka ntete kuna.

²⁶³ Beno lemvokila munu, kana mu me lwadisa bansatu ya beno, bampangi, samu na yawu. Munu—munu... Yina kele mbote mingi. Nzambi lenda sala ti menga kukwisa, vinu kukwisa, to mafuta kukwisa, nionso yina Yandi me zola, kasi yina ke katula masumu ve. Ve, tata. Ve, tata. Ve, ata fioti ve. “Menga ya Yesu Klisto ke zimbisa ngolo ya Yawu ata fioti ve, tii kuna Dibuundu ya Nzambi ya kusumbuluka ke vuluka, samu na kusumuka diaka ve.”

²⁶⁴ Mu tubaka, “Mpangi Jaggers?” Mu tubaka na yandi; mu bokilaka yandi na alo-allo. Mpe mu vwandaka na Bantu ya Mumbungu ya Miklisto. Mpe mu tubaka, mu tubaka, “Mpangi O. L.?”

²⁶⁵ Yandi tubaka, “Wapi kisika na yinza nge kele?” Mu vwandaka na mwa yinzo mosi ya banzenza ya ntalu fioti kuna. Mpe yandi tubaka, “Nge zola tuba na munu ti ya ke bawu me tula nge kuna?”

²⁶⁶ Mu tubaka, “Ya kele luzolo ya munu. Ntangu mu kwisaka na kisika ya beno,” mu tubaka, “yinki beno me sala? Beno tulaka munu kuna na Hotel Statler, mpe ya lombaka ti mu vwanda kuna na nsuka. Bawu vwandisaka munu na mesa mosi; mu zabaka ve wapi mbele ya kusadila, to kima yankaka. Mpe mu lendaka ve... Mu lutaka kuna, mu lwataka kazaka ve, ba zolaka basisa munu na nganda.” Mpe mu tubaka, “Mu—mu zaba ve mutindu ya kukiyala munu mosi.”

Yandi tubaka, “Mu ke nata nge kuna, kana ba ke na bumputu mingi samu na kusala yawu.”

²⁶⁷ Mu tubaka, “Ve, tata.” Mu tubaka, “Yina mu zola kusala kele kubaka steak na nge, kana nge lenda futa samu na yawu.”

Mpe yandi tubaka, “Mbote mingi.”

²⁶⁸ Na yawu beto kwendaka na kisika yango, mpe beto vwandaka. Mpe mu tubaka, “Mpangi Jaggers, kieleka mu ke zolaka ya nge...”

²⁶⁹ Mpe kieleka yandi kele nkundi ya munu ya luzolo, mpangi-bakala ya ntalu. Mpe mu—mu vwandaka na mwa buku ya yandi, mpe yandi... kisika ya vwandaka zonza samu na kento yina kukatukaka na bayinsi ya nzenza, yina vwandaka na menga yina

na maboko ya yandi, mpe nionso yina. Na yawu mu vwandaka na yawu awa. Mu zolaka kaka ti yandi ndima yawu ve mbala mosi, na yina mu vwandaka na yawu na papié ya yandi—ya yandi, beno zaba.

²⁷⁰ Mu tubaka, “Mu me mona ti nge ke na kwenda kaka na ntwala, ti nge me banda, ti nge ke banda mvumbukulu mosi ya nene kuna.” Na yina, Bantu ya Mumbungu ya Miklisto kunataka munu kuna, ya kieleka.

²⁷¹ Ya ke monana ti bantu lenda zaba. Kana Mpeve-Santu lenda monisa yawu na kisika ya malongi, Yandi lenda ve kutuba na munu yina ke salama na bisika, bampangi?

²⁷² Mu lenda tuba na nge, mpova na mpova, mpe kusiamisa yawu na nzila ya Mpangi Carlson, mpe mpangi-bakala yayi awa. Mu vwandaka na lukutakanu, mazono, mpe mu tubaka na bampangi yayi yinki ke salama awa na suka yayi. Ya kieleka. Ya kulunga. Beno me mona? Samu, Mpeve-Santu vumbulaka munu, mpe tubaka, “Telema pene-pene ya nela.” Mu talaka, na nela yango, mpe Yandi talisaka na munu kieleka kaka diambu *yayi*. Mu tubaka, “Ntangu yayi, bampangi . . .” [Mpangi-bakala mosi me tuba, “Ya kieleka.”—Mu.] Mu talisaka beno mambu yayi, ya kieleka ya kulunga. Yawu yayi! Beno me mona?

Mpamba ve, bawu fwana zaba yawu.

²⁷³ Awa ntama mingi ve, bakala mosi telemaka, awa na Chautauqua, mpe tubaka, “Mpangi Branham kele profete.” Mu ke tubaka ve ti mu kele profete. Beno me mona? Kasi yandi tubaka, “Mpangi Branham ke vwandaka profete ntangu yandi kele na nsi ya Mpeve ya kuswasikisa mabanza, kasi,” yandi tubaka, “oh, Malongi ya yandi kele ndikila. Beno sala keba na Yawu.” Mu banzaka, muntu ya kutanga, lenda tuba diambu ya mutindu yina?

²⁷⁴ Yinki *profete* zolaka tuba? “Mutendudi ya Ndinga na mutindu ya Kinzambi.” “Ndinga ya Mfumu kwisaka na profete,” beno me mona. Kasi, kaka yina, ya kele mpe diambu ya kutuba awa ve.

²⁷⁵ Kasi, na mutindu nionso, Mpangi Jaggers. Mpe mu tubaka, yandi tubaka, oh . . . Mu tubaka, “Mu monaka diambu ya kento yina ke na menga na diboko ya yandi.”

²⁷⁶ “Oh,” yandi tubaka, “Mpangi Branham, ya kele diambu ya kuyitukisa yina nge me monaka ntete ve!”

²⁷⁷ Mu tubaka, “Mpangi Jaggers, mu zola nge. Ya ntete, mu zola ti nge tula diboko ya munu kati na yina ya nge. Beto tuba ti beto ke bampangi.”

Yandi tubaka, “Ya kieleka. Yinki kele diambu?”

²⁷⁸ Mu tubaka, “Nge ke mosi ya balongi ya kulutila ngolo yina mu me zaba. Nge ke kisadilu ya nene—nene ya Nzambi!”

²⁷⁹ Yandi tubaka, “Matondo na nge, Mpangi Branham. Nge ke muntu ya kukikulumusa mingi.”

²⁸⁰ Mu tubaba, “Mu ke tuba mutindu yina ve samu na kuvwanda muntu ya kukikulumusa. Mu me tuba mutindu yina samu mu me kwikila yawu. Nge ke kisadi ya Nzambi.” Kasi mu tubaka, “Mpangi Jaggers, kana kaka nge... Nge me—nge me kwenda ntama mingi; nge ke na nzikisa ve ya mambu yina nge ke na kutuba. Nge ke tula fondasio...”

²⁸¹ Mpe tala yina kele diambu na mingi kati ya beno ba-Assemblée de Dieu, mpe bantu yankaka, samu na balukutakanu ya kubeluka yayi ya nzutu. Mu ke nganina beno ve. Ya ke na mambu mingi ke luta... Mpe Tommy, awa, kele mpangi-bakala ya mbote, mpe beto zaba mutindu yandi me telema mbote-mbote. Kasi ya ke na mambu mingi na yinsi bubu yayi na nsi ya nkumbu ya kubeluka ya Kinzambi, kuyituka ve beno ke zolaka ve kusimbisa lukutakanu na kati ya mbanza. Ba ke kwisa mpe ke benda bantu mbongo, mpe ba ke kwenda. Yinki ba ke na yawu? Ba ke pesaka ve na bantu kima yankaka kulutila yina beno ke pesaka na kisika ya malongi, na chaire ya beno mosi. Mpe beno ke ya kusungama, bampangi. Mu ke tuba na beno, beno ke ya kusungama. Kasi ya ke kaka mutindu...”

²⁸² Mu vwandaka tanga disolo ya Martin Luther. Ya me tuba, “Ya vwandaka mansweki ve mutindu Martin Luther teleminaka dibuundi ya Catholique, mpe nungaka yawu.” Beno me tangaka disolo ya yandi. “Kasi ti Martin Luther lendaka na kutelemisa yintu ya yandi na zulu ya bufanatiki yina landaka mvumbukulu ya yandi, ya vwandaka mansweki.”

²⁸³ Mpe kana diambu ya kuyitukisa me salama, bantu yina ba me zengaka ve bubakala ke landa, kaka mutindu ya vwandaka na Egypte. Mpe ya ke kotisaka ntangu nionso mubulu na yinsi. Beto zaba yawu, ntangu beto ke kumaka kuna. Na yina, Koré kutelemaka, mpe Nzambi bebisaka yawu. Kasi, bampangi, mu ke nganina beno ve.

²⁸⁴ Mpangi Jaggers vwandaka kuna mpe yandi vwandaka meka na kutuba na munu ti yina Mpeve-Santu vwandaka sala yawu. Mpe tubaka... Na yawu mu vwandaka, na kati ya zulunale ya yandi mosi... Mu tubaka, “Mpangi Jaggers, ntangu yayi,” mu tubaka, “Mu sukaka na kalasi ya sambwadi. Mpe nge ke Docteur ya Theologie, mpe nge me longukaka samu na kuvwanda avocat. Nge me yela na dibuundi mosi ya kitoko, ya mbote, ba-Assemblée de Dieu. Tata ya nge pesaka lusalusu samu na kubanda lukwikilu yango. Mpe nge na kukabwana, yina me tala nge.” Kasi mu tubaka, “Yina me tala konso muntu yina, yina zola sala mutindu yina. Mu ke tula ata ndilu mosi ve kuna. Kasi ntangu ya me kuma diambu ya kisadilu mutindu nge, yina lenda nunga mafunda ya mielo samu na Klisto, nge ke tunga ministere ya nge na zulu ya nsatu ya nzutu.” Mu tubaka, “Mpangi Jaggers,

nge ke tunga dikunzi mutindu *yina*, kana nge ke na nzikisa ve samu na yawu, ya ke kubwa na ntangu fioti. Mpe nge fwana vwanda na Masonuku samu na *yina* nge ke tuba.”

Yandi tubaka, “Ya kele na Masonuku.”

Mu tubaka, “Basisa yawu.”

²⁸⁵ Yandi tubaka, “Mbote, Mpangi Branham,” yandi tubaka, “*yina* ke Mpeve-Santu ke na kusala yawu.”

²⁸⁶ Mu tubaka, “Talisa na munu Masonuku kisika Yawu me tuba ti, Mpeve-Santu menga basikaka na muntu, mpe nionso *yina*, mutindu *yina*. Talisa yawu kaka; kubasisa mafuta na nzutu ya bawu. Nge me tuba, ‘Ti mafuta vwandaka samu na kubeluka ya nzutu ya Kinzambi.’ Mpe nge me tuba, ‘Ti menga ya kento kele mpulusu ya bayinsi.’” Mu tubaka, “Kana ya ke mutindu *yina*, na yawu yinki salamaka samu na Menga ya Yesu Klisto? Ya ke katulaka. Mpe konso kima *yina* me swaswana na Yawu, ya ke mbeni. Ya me swaswana na Yawu.” Mu tubaka, “Ya me kuma malongi ya mbeni ya Klisto.”

“Oh,” yandi tubaka, “Mpangi Branham, nge ke zaba kilumbu mosi.”

²⁸⁷ Mu tubaka, “Mu banza ti mu ke zaba mutindu *yina* ve. Ntangu yayi, mpangi-bakala,” mu tubaka, “Mu zola nge, mpe nge kele mpangi ya munu.” Mpe mu tubaka, “Mpangi Jaggers, nge ke mata na divala mosi, na manima ya mwa ntangu fioti, ti nge lenda vutuka ve. kuvutuka na dibuundu ya nge, mpe kuvutuka mpe bikala na Nsangu ya mbote.” Mpe mu tubaka, “Kutunga yawu ve na zulu ya bakuningana ya nzutu.” Mu tubaka . . .

²⁸⁸ Ntangu yayi yandi me kuzwa, yandi me botama na Luzingu ya Kukonda nsuka, beno zaba, “Konso ntangu beno ke botika, beno ke vutuka kento ya ntwenia to bakala ya ntwenia. Ntangu *yina* ke sala ti . . . Nge ke (ata fioti ve) kufwa ve.” Na yawu, *yina*, yawu, yandi me kuma na nsuka divala na ntangu yayi; mpe yankaka “vitamine me fikama na Nzadi Mungwa.” Beno me mona? Kasi ya kele mutindu *yina*, mpangi-bakala, nge me banda na mwa bansatu *yina* ya nzutu.

²⁸⁹ Mpe beno babakala yayi awa ke na mabuundu yayi, beno ke bika kima ya mutindu *yina* kukota na mbanza, mpe, beno zaba, diabulu ke na mayele mingi, mpe yandi—yandi ke kotaka na mambu ya mutindu *yina*. Yandi ke swanaka samu na yawu. Mpe yandi—yandi ke salaka ti bantu kusalana mpasi na kati ya bawu, mpe yandi ke nataka mubulu na kati ya dibuundi, mpe nionso *yina*. Kasi ya ke mutindu *yina* ve.

²⁹⁰ Ntangu yayi, awa. Ata yinki mutindu beno ke ya kusungama, beno tala kima *yina* beto ke kondwaka mpe ke zimbanaka, bampangi ya munu. Ntangu yayi mu ke sukisa, na kutuba mutindu yayi. Ata mutindu mu kele ya kusungama, mpe mutindu

mu me zaba Masonuku, mpe mutindu mu me zaba Biblia ya Nzambi; Kana mu ke na Mpeve ya Nzambi ve, ya zola, na kati ya ntima ya munu, samu na bantu nionso mpe muntu nionso, kuna mu kele na kyeta na kubanda.

²⁹¹ Ntangu yayi, Paul tubaka, na ba-Corinthien ya Ntete kapu 13, “Mu lenda vwanda na dikabu ya luzabu, beno me mona, mpe kubakula mansweki nionso ya Nzambi, beno me mona; na nionso, mbote; mpe mu me kondwa zola, mu kele muntu ya mpamba. Mpe mu lenda tuba na bandinga ya bantu mpe ya bawanzio,” yawu yina beno ke solulaka na yawu na Nzambi, mpe ntangu nionso yina ba lenda tendula ve. “Mu lenda tuba na bandinga ya malu-malu, bandinga ya kieleka ya bantu mpe ya bawanzio, mpe kana mu ke na zola ve, kuzola, mu ke kuzwa ndandu ve.” Na yawu kana mu me zaba mamsweki nionso ya Nzambi, mpe mu lenda fungula yawu mpe—mpe mu sala ti nionso kutambula mbote, mpe kana mu ke na zola ve, wapi mbote ya lendaka sala? Mpe ntangu mu . . .

²⁹² Yesu tubaka, “Na yayi bantu nionso ke zaba ti beno kele bilandi ya Munu, ntangu beno ke vwanda . . .” ntangu bantu ya ba-Assemblée kele na zola samu na ba-Unitaire, mpe ba-Unitaire kele na zola samu na ba-Assemblée, “ntangu beno kele na zola, mosi na yankaka,” ya vwanda ya kusungama to na yimbi. Mpe kana kikuma kele yimbi, mitifi kele yimbi, mpamba ve, na yawu beno ke na kifu na kubanda. Mutindu yina ve? Beno me mona, “Mu lenda tuba na bandinga ya bantu mpe ya bambanzi, mpe kana mu ke na zola ve, mu kele muntu ya mpamba.” Samu, Nzambi kele zola. Beno zaba yawu.

²⁹³ Mpe mu ke kwikilaka na kutuba na bandinga. Ntangu yayi, muntu mosi tubaka, “Mpangi Branham ke kwikilaka ve na nzikisa ya ntete.” Mu siamisa diambu yango kintwadi na beno ntangu yayi. Beno me mona? Mu ke tuba na beno.

²⁹⁴ Mu ke kwikilaka ti ntangu muntu me yamba Klisto, yandi ke kuzwaka kitini ya Mpeve-Santu. Mpamba ve, Yesu tubaka, na Matthieu kapu 12, ya kapu 5 mpe makumi zole- . . . nzila ya 24, Yandi tubaka. Ve, mu ke kwikila ti ya kele Santo Jean 5:24. Yandi tubaka, “Yandi yina ke kuwa Bandinga ya Munu, mpe ke kwikila na Yandi yina tindaka Munu, yandi ke na Luzingu ya Kukonda nsuka.” Ntangu yayi, ya ke kaka na mutindu mosi ya Luzingu ya Kukonda nsuka. “Mpe yandi ke kwisa ve na lufundusu; kasi yandi me katuka na lufwa samu na kuzwa Luzingu.”

²⁹⁵ Ntangu yayi, mu ke kwikila ti muntu mosi ve lenda kukibokila yandi mosi; Nzambi kaka fwana bokila yandi. Mpe kana ya kieleka Nzambi me bokila yandi . . . Mpe ya ke na bantu mingi, beto me zaba yawu, bampangi, bayina me zanguka ntima mpe ke banzaka ti Nzambi me bokilaka bawu, kasi luzingu ya bawu na mbala mosi . . . kumona ti, beno ke mona yawu. Kasi kana Nzambi bokilaka beno, mpamba ve, beno kele, beno ke

vwanda kuna, mpe beno ke bikala kuna, beno me mona, beno me zaba. Na yawu kana . . . Ntangu yayi, yina ke malongi ya baptiste ve. Beno zaba yawu, beno me mona.

²⁹⁶ Kasi, mu ke kwikilaka ve na kupesana mbote mpe kuzwa lukengolo ya Seko, mpe bima nionso yina. Mu—mu ke kwikilaka yawu ve, ata fioti ve. Kana bawu ke zola kukwikila yawu, mbote, yina ke mbote mingi. Mu ke tuba kaka ti ba ke bampangi ya munu.

²⁹⁷ Na suka yayi, kana mu ke lomba beno kitini ya tarte, (ya ke monana ntangu ya madia ya midi), mu lenda zola yawu na cerise, mpe beno lenda baka yawu na pomme, kasi beto zole ke kudia tarte. Beno me mona? Na yawu ya ke sala luswaswanu mosi ve . . . mutindu beto ke na kudia tarte.

²⁹⁸ Ya ke mutindu yina beto ke kwikilaka. Kana beno zola vwanda Unitaire, beno vwanda Unitaire; kana beno zola vwanda muntu ya Assemblée de Dieu, beno vwanda muntu ya Assemblée de Dieu. Kana beno zola vwanda nionso yina beno kele, Baptiste, Presbyterien, beno vwanda Muklisto kati na yawu. Beno me mona?

²⁹⁹ Mpe—mpe beno sosa yawu beno mosi, kasi beno swana ve bamosi mpe bayankaka. Samu, mambu yayi ya fioti, ya ke simbanaka kintwadi. Ya kieleka. Yawu nionso ke simbanaka kintwadi mpe ya ke kutanaka kisika mosi.

³⁰⁰ Mpe—mpe ata konso yina beto me sala, bimangu yikwa beto lenda sala, miongo yikwa beto lenda katula, to ya vwanda konso kima yina, tii kuna beto ke kuma na kisika yina beto ke zolana, ya luvunu ve, kasi beto ke zolana bamosi mpe bayankaka. Ntangu beto ke zola bampangi nionso, ya vwanda ya konso dibuundi yina, beto zola yandi; beto sala yawu na luvunu ve; samu beto zaba ti ya ke dibanza ya basambidi, ti, “Ya ke lomba ti beto sala yawu.” Kasi, samu beto ke salaka yawu, beto ke zolanaka mosi na yankaka; na yawu, na ntima ya yinda, kukanga ntima bamosi mpe bayankaka.

³⁰¹ Mpe mu ke kwikilaka, na Colossien 3, na kutala na 9, kisika mosi kuna . . . Mu lenda, mu—mu lenda ve . . . Mu lenda zimbana Masonuku, kasi Yawu me tuba mutindu yayi. Na ntangu beto me kuma Baklisto, beto lenda vwanda kimpala ve. Beno me mona? Beto lenda vwanda na lukwikilu ve ntangu beto ke meka na kupesa luzitu mpe lukumu bamosi mpe bayankaka. Beno me mona, beto lenda sala yawu ve; beto lenda vwanda na lukwikilu ve. Beto fwana vwanda na lukumu na Nzambi, beno me mona, kupesa Yandi lukumu. Kukwikila na bampangi ya munu, ya kieleka, ya kele zola; kasi luzitu mpe lukumu ke vutukaka na Nzambi! Na yina me tala . . . Kasi beno vwanda na lukwikilu mpe beno tula ntima na mosi na yankaka. “Mpe beno vuna bamosi mpe bayankaka ve.” Beno me mona? “Beno vuna ve bamosi mpe bayankaka.” Kana beno me tuba na suka yayi, “Mu zola nge,”

mu fwana tuba yawu na ntima. Kana ve, mu ke muntu ya luvunu. Ya kieleka.

³⁰² Ntangu yayi, bampangi, na lweka yina mosi . . . Ntangu yayi, Mpangi Tommy, mu banza ti mu me baka ntangu mingi ve awa. Munu . . . Mpangi Tommy ke na diambu ya kutuba na mwa sekonde fioti. Kasi mu lenda tuba mutindu yayi, ntangu mu kwisaka na kati ya beno . . .

³⁰³ Mu ke banzaka mutindu yayi. Mu ke banzaka ti Nzambi Tata ya beto fikaka mwense mosi na kivudi na nkumbu ya Marie, mpe salaka na kati ya yandi cellule ya Menga yina butaka Yesu Klisto, yina vwandaka Mwana ya Nzambi, tabernacle yina Nzambi bumbanaka Yandi mosi, na nzutu, monisamaka Yandi mosi na kati ya beto. "Nzambi vwandaka kati na Klisto, samu na kuvutula ngwisani na kati ya yinza na Yandi mosi." Mu ke kwikila ti cellule ya Menga yina pasukaka na Calvaire, samu na lemvo ya masumu ya beto. Mpe Mpeve basikaka na Yandi mpe vutukaka na zulu ya Dibuundu, samu Klisto, Mpeve-Santu; Klisto, Logos, vwandaka na kati ya beto ntangu yayi, Mpeve-Santu, na nzila ya mbotika. Ya ke sala beto . . . Klisto kukikabisaka Yandi mosi, samu na kupesa Luzingu ya Yandi na mosi na mosi ya beto, ti beto, mutindu nkonga ya bantu, lenda vwandaka Dibuundu ya Nzambi. Mpe ntama mingi ve . . .

³⁰⁴ Mu vwandaka tambula na mpunda. Beno zaba yawu. Tata ya munu vwandaka munati-mpunda, ya kulutila nene. Mu vwandaka twadisa mpunda. Beto vwandaka twadisa . . . na Lubwaku ya Arapaho, to mu zola tuba na Nzadi ya Troublesome, kuna na Simu ya Arapaho. Ya ke Kimvuka ya Hereford ke disaka baniama na lubwaku yina. Mpe na zulu na lubwaku yango, bankwa ya bilanga yango, bawu—bawu ke na matiti mingi yina bawu lenda kulisa. Mpe kana kilanga me basisa pene ya tonne mosi ya matiti, beno lenda nata ngombe na—na matiti yango, kuna na nsi ya Parc Estes, mpe beno lenda nata ngombe na ma . . . Mu ke zolaka kuzomba mingi, kuna na zulu. Mpe mu salaka kisalu ya kusansa bangombe kuna mvula mosi. Mu ke kwendaka kaka kuna, na Printemps mpe na Automne, ntangu mu ke na kisalu ve mpe kana mu lenda sala yawu, mpe mu ke vukisaka bitwisi, kaka samu mu vwandaka kuna, samu mu ke zolaka kutambula na mpunda. Mpe mu ke tambulaka sika na sika na kila— . . . na lubwaku yango, ya ke na nkonga ya ba cowboy yina ke na muswa ya kukota kuna, mpe samu na kudisa bitwisi ya bawu. Mpe na nsungi ya Printemps, mbala mingi, mu sadisaka bawu na kuvukisa bitwisi kintwadi mpe kunata bawu kuna.

³⁰⁵ Mpe ya kele na lupangu mosi ya bitwisi, samu bawu vutuka ve na bantoto ya bantu yankaka, ntangu ba ke na kuluta na kilanga ya matiti. Tii . . . Mpe cow-boy ke telemaka kuna mpe ke tanga bitwisi yina na ntangu ba ke kota, ntangu ba ke kota. Mpe mu vwandaka kuna, na mwa bilumbo, ngunga na manima ya

ngunga, mu vwandaka tala nkonga ya Tata Grimes ke kota, yandi vwandaka na Diamand Bar; ya beto vwandaka Turkey Track; mpe ya vwandaka na Tripod kaka na nsi ya beto; mpe yina ya Jeffrey, mpe nionso yina. Na yawu ntangu mu vwandaka tula dikulu ya munu, mutindu mingi na kati ya beno me zaba, na zulu ya dibaya ya kiti, mpe mu vwandaka kuna mpe vwandaka tala mutindu cow-boy yina vwandaka ya kutelema kuna, vwandaka tanga bitwisi yayi.

³⁰⁶ Mu monaka kima mosi. Yandi salaka bukebi mingi ve na kidimbu yina ya vwandaka na yawu. Kasi ya vwandaka na kima mosi kaka yandi vwandaka sosa, ya vwandaka kidimbu ya menga. Ya fwana vwanda kaka ya dibuta ya Hereford kana ve ya ke luta ve na lupangu yina, kasi kidimbu vwandaka sala luswaswanu mingi ve.

³⁰⁷ Mpe mu banza ti ya ke vwanda mutindu yina na Lusambusu. Yandi ke tala ve na kidimbu ya beto, kasi Yandi ke sosa kidimbu ya Menga.

³⁰⁸ Mu me salaka bifu mingi, bampangi, mpe mu me salaka mambu mingi yina kele mbote ve. Mpe kana mu me longaka ntete kati na nzietelo, to beno me waka kima mosi yina mu me zonzaka to mu me tubaka, yina lenda vwanda disakuba ya konso mutindu yina, to kana mu me tuba kima mosi na suka yayi yina ke disakuba, mu ke lomba beno, mutindu mpangi-bakala ya Muklisto to mpangi-kento, na kulemvokila munu. Ya ke dibanza ya munu ve na kusala mutindu yina. Mu me zibula kaka ntima ya munu na beno, samu beto kuzaba.

³⁰⁹ Kana ya ke na kisalu ya mbotika, beno bampangi ya babakala beno sala yawu, beno mosi, beno me mona. Ya kele, mu—mu ke salaka yawu ve. Kana mu ke sala yawu, mu ke botika mutindu yina, mu ke botika mutindu yina. Mpe beno zole lenda ndima yawu, beno me mona. Na yawu beno lenda ndima muntu yina, ba me botika na Nkumbu ya Tata, Mwana, mpe Mpeve-Santu, mpe muntu yina ba me botika na Nkumbu ya Mfumu Yesu Klisto, mpe. Na yawu kana mu ke botika muntu mosi... kasi mu me salaka yawu ntete ve. Mu ke botikaka kaka na dibuundi ya munu mosi, mpe ya kele kaka bantu yina kuna. Mpe ya kele mutindu yina ba ke botikaka bantu na dibuundi ya munu. Mpe kana beno zola tala na manima, ya kele mutindu ya ba-Missionaire ya ntama, mutindu ya ba-Missionaire Baptiste ya ntama. Mpe ntangu yayi kana... Ya kele mutindu yina.

³¹⁰ Mu ke kwikilaka na kubeluka ya Kinzambi. Mu ke kwikilaka na mbotika ya Mpeve-Santu. Mu ke kwikilaka ti—ti Mpeve-Santu ke tubaka bandinga ya malu-malu. Mu ke kwikilaka na makabu nionso yina Nzambi pesaka na Dibuundi ya Yandi. Mu ke kwikilaka yawu, na muvimbba. Kasi mu ke kwikilaka...

³¹¹ Mu ke kwikilaka ve na kubeluka ya nzutu ya ba-sensation ya bilumbu yayi. Mu zola tubila diambu mosi awa. Ya me luta

mwa ntangu fioti ya vwandaka na mpangi-bakala mosi... Mpe ya kele ve Mpangi ya munu ya ntalu Tommy Hicks, yina kele samu na munu kisadi ya kieleka ya Klisto. Ya vwandaka na bakala mosi na yinsi yankaka, mpe na yinsi yayi ya vwandaka na... Yandi vwandaka kaka, na ntangu nionso, "Munganga ya Nzambi ya ba-sensation! Munganga ya ba-sensation," beno zaba, mutindu yina.

³¹² Mpe mu kuzwaka mukanda mosi na manima muntu yango vwandaka... ya dibuundu ya Luther. Mpe secrétaire ya munu awa me zaba ti beto ke na yawu na mikanda ya beto. Mu ke tuba nkumbu ya bakala yango ve, samu kusala mutindu yina ke Kimuklisto ve. Ata ti, mu ke wisana na mabanza ya bakala yango ve, kasi ya kele kieleka nionso mbote. Mu zola yandi. Yandi ke mpangi ya munu ya bakala.

³¹³ Kasi ya me kuma na kisika yina ba ke na nsatu ya mwa sensation, to kuningana ya nzutu, to kima yankaka ya mutindu yina, beno me mona. Mpe, yina, ya ke mbote ve, beno me mona. Mpangi-bakala... "Bangalasise ya nzutu kele mfunu kaka na mwa mambu fioti."

³¹⁴ Na yawu longi yayi ya Lutherien sonikilaka longi yayi mukanda. Mpe yandi tubaka, "Beno ba-evangeliste Americain yina ke kwisaka awa," yandi tubaka, "na kubeluka ya beno ya nzutu ya ba-sensation nionso samu na bantu nionso!"

³¹⁵ Mpe ntangu yayi ya ke monana ti mu ke kukipesa lukumu munu mosi, kasi Nzambi zaba ti ya ke dibanza ya munu ve. "Kasi," yandi tubaka, "ntangu—ntangu mwana yayi Deborah Stadsklev kufwaka, bébé yina, mpe mama yina telemaka kuna kilumbu yina na India...na Californie, kisika bébé yina kufwaka, mpe yina kumaka madidi. Mpe ya monaka...ba me tulula bébé yango na maboko ya Mpangi Branham, mpe yandi telemaka kuna mpe sambilaka samu na yandi. Mpe bébé yango bandaka na kuboka mpe kuningana; mpe ya vutudilaka yandi bébé yango."

³¹⁶ Yandi zabaka diaka diambu ya Mexique. Na yina, beto lenda ndima kimbangi ya Bantu ya Mumbungu ya Nsangu ya mbote ya Muvimba. Beno fwana vwanda na kima yina dokotolo me ndima. Ntangu mwa bébé yina ya Mexique kufwaka na suka yina, na ngunga ya yivwa, mpe yayi kuvwandaka na ngunga kumi na mosi ya nkokila. Dokotolo sonikaka mukanda ya kimbangi. Mpangi ya bakala Espinoza, yina mingi ya beno bampangi ya Assemblée de Dieu kuzaba, ya vwandaka yandi muntu bakaka kimbangi yina na dokotolo, ti yandi kufwaka.

³¹⁷ Mpe mu monaka vision mosi na zulu ya nkonga ya bantu, ntangu bantu ya Katolika mafunda makumi zole kwisaka na Klisto, na Mexico City. Mu tubaka, "Beno baka yawu ve. Mu zaba ve, bébé yango... Mu me mona kaka vision mosi awa."

³¹⁸ Mpe Billy vwandaka kuna, ke meka, na ba-huissier makumi tatu to makumi yiya, bawu vwandaka kuka ve na kukangisa nzila na mwa kento yango na ndonga ya bisambu, na bébé yango. Yandi vwandaka kota na makulu ya bawu, mpe nionso yina. Na yawu, na nsuka-nsuka, mu tindaka Jack Moore kuna. Mu tubaka, "Kwenda, sambilia samu na yandi."

³¹⁹ Mu talaka kuna, mpe mu monaka mwa bébé yango ya Mexique ke seka. Mu tubaka, "Beno vingila fioti. Beno nata yandi awa." Beno me mona? Mpe ntangu mu tetikaka maboko ya munu na zulu ya bulanketi yina... Mvula nokaka mingi, kilumbu ya muvimba. Mpe bawu vwandaka kuna na suka-suka na suka yina, mpe ya vwandaka pene ya ngunga kumi na mosi ya nkokila. Mpe mu tetikaka maboko ya munu na zulu ya mwa bébé yango. Yandi bandaka na kuningana mpe kutuba-tuba. Mpe bawu bandaka na kuboka.

³²⁰ Na yawu, na manima bawu kulumusaka yandi mpe bawu kwendaka sosa mukanda ya kimbangi. Bawu kwendaka na dokotolo, mpe dokotolo tubaka, "Mu tubaka ti bébé kufwaka, na suka yayi na ngunga ya yivwa. Yandi fwaka na pneumonie." Beno me mona? Mpe na yawu bima yina kele—kele—kele ya kieleka. Ya kele bimbangi. Ya fwana vwanda.

³²¹ Beto fwana vwanda ntangu nionso ya kusungama mpe na makieleka na mambu nionso. Beno sala yawu ve... Beno bika ya vwanda kaka yina yawu kele. Beno bika yawu... Nzambi ke na nsatu ya lusadusu mosi ve. Beno me mona, Yandi—Yandi—Yandi kele Nzambi.

³²² Na yawu yandi tubaka ntangu yayi, "Kasi ntangu mama yayi bokilaka Mpangi Branham na Amerique, yandi vwandaka tuba na yandi ke dila na alo-aloo, 'Kwisa vumbula bébé ya munu na lufwa!' Mpe Luyalu ya Etats-Unis..."

³²³ Bakala ya yandi kele longi na Makesa. Mpe beno nionso me zaba Julius, mingi kati ya beno me zaba yandi; mu sonikaka buku ya munu, *Profete Mosi Me Kwenda Tala Afrika*.

³²⁴ Mpe mwa mama yina ya Norvège, vwandaka boka, na ngolo nionso, yandi tubaka, "Mpangi Branham, mu vwandaka kuna na ntangu bébé yango vutukaka na lizingu!" Yandi tubaka, "Beto ke kwikilaka ti nge ke kisadi ya...ya Klisto." Yandi tubaka, "Kwisa, tetika maboko na zulu ya bébé ya munu, mpe yandi ke zinga." Yandi katukaka na kufwa na ntangu mosi to zole, na pneumonie; yandi vwandaka bela na kutala bangunga yiya, to tanu.

³²⁵ Mpe bantu yayi vwandaka kuna, ke boka mpe ke dila, mpe ke lemuka na zulu mpe na ntoto, bawu tubaka, "Nzambi ke vumbula yandi! Nzambi ke vumbula yandi!" Mpe ba tubaka...

³²⁶ Na yina, American Air-... to, American Airlines. Basoda ya Etats-Unis zolaka nata munu kuna na avion ya reaction, mpe kuvutula munu, na kilumbu mosi. Beno me mona?

³²⁷ Mpe mu tubaka, “Na ntwala mu kwisa, bika mu sosa luzolo ya Mfumu.” Na yawu mu sambilaka, bilumbu zole. Mpe dokotolo yina vwandaka na lutondo mingi ti yandi bikaka bébé yango ya kulala kuna.

³²⁸ Na yawu, na suka mosi, mu vumbukaka mpe mu bandaka na kukwenda na kinkuku. Mu talaka, kuna, na zulu, ya vwandaka na Nsemo mosi pene ya kitezo ya nsemo yina kuna, ya vwandaka baluka, ya tubaka, “Kusimba yawu ve. Kunganina yawu ve. Yina ke diboko ya Mfumu.”

³²⁹ Mu vutukaka na nswalu mpe mu bokilaka na yinsi yango, mpe mu bokilaka na alo-allo mpe mu tubaka, “Mu—mu ke kwisa ve.”

³³⁰ Mpe longi yayi ya Lutherien tubaka, “Samu na yinki nge me vingila ve tii kuna nge ke kuzwa lukanu ya kieleka ya Nzambi, mutindu Mpangi Branham salaka? Na yawu beno ke zaba yina beno ke kutuba.”

³³¹ Ntangu yayi, ya kele mutindu yina, bampangi, kana beto zola ve kubaka balukanu na nswalu nionso; mpe beno vingila, mpe beno kuzwa lukanu ya mbote, mpe ya kieleka na Nzambi.

³³² Mpe nionso yayi awa, kubeluka ya nzutu ya bansumuki yina zaba kima mosi ve samu na Nzambi. Mu ke kwikilaka ti kubeluka ya Kinzambi me vwanda na zulu ya musiku mosi, ti beno fwana kwisa na Nzambi, ntete, mpe kupesa Yandi ntima ya beno, mpe kusukula baluzingu ya beno na Menga ya Yesu Klisto, na manima Nzambi ke kwisa sala na beno mpe ke belusa beno. Ya ke kaka mutindu mpangi-bakala yayi tubaka, samu na mwa kento yina yandi sambidilaka kuna, santu ya Nzambi, beno me mona.

³³³ Na luzingu ya munu, mu me salaka bifu mingi. Mu me salaka mambu yina kele mbote ve. Ntangu yankaka, kana mu ke zinga mingi, mu ke sala diaka mingi yankaka. Ntangu yankaka mambu yankaka na kati ya yawu ke vwanda matadi ya masakuba na nzila ya beno. Mu banza ti beno ke lemvokila munu.

³³⁴ Mu vwandaka tanga disolo ya Abraham, mambu yina yandi nungaka ve. Wapi mutindu yandi, oh, la la, mambu yina yandi salaka; yandi tulaka ntembe na Nzambi; mpe yandi vunaka samu na kento ya yandi; mpe nionso yina. Kasi ntangu ba sonikaka kimbangi ya yandi ya Kinzambi na ba-Romain 4, bawu me zonza ata fioti ve samu na bifu ya yandi, kasi ba me tuba, “Abraham tulaka ntembe ata fioti ve” na kukondwa lukwikilu...na Nzambi, “kasi lukwikilu ya yandi vwandaka pesa yandi ngolo.” Ba lemvikilaka yandi bifu ya yandi nionso, ntangu ba sonikaka kimbangi ya Kinzambi ya luzingu ya yandi. Ba zonzilaka ve na mambu yina yandi nungaka ve. Ba zonzaka ve bifu ya yandi.

³³⁵ Mpe, bampangi, mu banza, ti ntangu ba ke tanga kimbangi ya munu Kilumbu yina, ti Yandi ke vwanza ya munu, mpe, mpe

ya ke banza yawu diaka ve. Mu banza ti beno ke sala yawu, mpe. Nzambi sakumuna beno.

³³⁶ [Docteur Tommy Hicks ke sala milabu yayi ke landa—Mu.]

[Mu banza ti beto lenda tuba na bunkufi nionso yina ba me tuba na suka yayi na mutindu yayi: Klisto kati ya munu kivuvu ya nkembo. Beno tuba yawu, na lemvo ya beno. Klisto kati ya munu kivuvu ya nkembo.]

[Ya ke vwandaka na bakukota na kubasika mpe bakumata na luzingu ya konso muntu. (Mu ke tuba ve.) Mu ke na nsangu mosi. Mu ke kwikila ti Muklisto nionso me vwandaka....?.... Yesu....?.... Ntima ya munu kele ya kuzanguka na suka yayi, mpe mu ke kwikila yawu samu mingi kati ya beto bima yankaka ke yangisa beto....?.... ya ke sala beto babakala mpe bakento ya kulutila mbote ya Nzambi.]

[Babe Ruth zabanaka mutindu Homerun King. Kasi beno zaba ti Babe Ruth vwandaka diaka Strikeout King? Yandi bulaka mingi na nganda kulutila yandi nungaka. Yandi bulaka na nganda bambala 1,330; yandi nungaka kaka bambala 860. Kasi ntangu nionso Babe Ruth bulaka na nganda, yandi vwandaka vutuka na banc de touche ntangu kiboba ya arbitre me boka, “Nge me bula na nganda,” yandi vwandaka vutuka na banc de touche mpe vukisaka maboko ya yandi kintwadi mpe lokutaka yinti mpe tulaka yawu na lupangu ya nsaka, ya vwandaka tuba ntangu nionso, “Mu ke na kiadi samu na muntu yina ke pesaka balle na bamibudi kuna.”]

[Ya ke yimbi ve na kubula na nganda, kasi beno bambuka moyo: beno lokuta yinti....?....samu Klisto kati ya munu kivuvu ya nkembo. Beno tuba yawu diaka pardo: Klisto kati ya munu kivuvu ya nkembo. Ya kele nionso.]

Yinga.

[Ya kele nionso.]

Ya kieleka.

[Ya kele nionso.]

Nionso. Amen.

[Alleluia. Kuswana mpe kunwana ke manisa diambu ata fioti ve. Beto me kuma pene-pene mingi....]

Amen.

[....na simu yina yankaka. Beto me kuma na kisika yina ya me kuma mpasi na kuvutuka na manima. Bantu yikwa yina me waka kapitene ke bambukisa moyo na pepo: “Beto me kuma na kisika yina ya me kuma mpasi na kuvutuka na manima.”]

[Ntama mingi ve mu waka ndinga mosi na yinza yankaka yina tubaka na munu mpe tubaka, “Mwana, nge me kuma na kisika yina ya me kuma mpasi na kuvutuka na manima.” Ya zola

tuba ti mu me kuma pene-pene na simu yina yankaka kulutila kisika mu bandaka.]

[Beno kanga meso ya beno, pardo; beno kulumusa bayintu ya beno.]

[Tata ya beto ya Mazulu, na suka yayi, beto ke vutula matondo mpe ke vutula melesi ti beto lenda tuba na kati ya bantima ya beto mpe na kati ya miyo ya beto, “Klisto kati ya munu—Klisto kati ya munu, kivuvu ya nkembo.” Oh, Yesu, tula maboko ya Nge ya zola pene-pene ya babakala nionso mpe bakento nionso, mpe bika ti vision ya beto mpe meso ya beto kuzibuka mingi—mingi, kulutila, kulutila bima ya yinza yayi, ti beno lenda mona Klisto, mpe bayankaka lenda mona Klisto na kati ya beto. Tetika diboko ya Nge na zulu ya mosi na mosi ya misadi ya Nge yayi . . .]

Pesa yawu, Mfumu.

[. . . bika ti, na ntangu beto ke basika na kisika yayi na suka yayi ti beto ke baka lukanu ya kutala kima mosi ve katula kaka Klisto . . .]

Amen.

[. . . ya ke kwizulu ya mbote na mosi na mosi. Beto zaba ti kisalu kele—ya ke na kisalu ya nene ya kusala, Yesu; ya kele na ntangu ya nene ya kubuka bambuka.]

Yinga, Mfumu.

[Oh, sadisa beto, Mfumu . . .]

Yinga, Mfumu.

[. . . yina ke vukisa maboko ya beto kintwadi . . .]

Pesa yawu, Mfumu.

[. . . mpe kubuka bambuma . . .]

Yinga, Mfumu.

[. . . samu na kununga yina me zimbana mpe yina me kufwa na ntwala ntangu kuluta mingi.]

Yinga, Mfumu.

[Mu zola ti beno telemisa maboko ya beno mpe beno kumisa Nkumbu ya Mfumu ya beto Yesu Klisto.]

[Beto lenda telema, pardo. Mu zola ti beno telemisa maboko ya beno mpe beno yimba na munu “Mu Zola Yandi.” Beno zola Yandi . . .]

Amen.

[. . . na suka yayi? Beno zola Yandi na ntima ya beno nionso? Beno telemisa maboko ya beno mpe beno yimba yawu, beto nionso kintwadi, “Mu Zola Yandi.”]

[Mu zola Yandi, mu zola Yandi,
 [Samu Yandi zolaka munu ntete,
 [Mpe futaka mpulusu ya munu]
 [Na yinti ya Calvaire.]

[Beno lenda niunguka yawu kaka pardo . . .]

[Beno zaba, bampangi balongi, na Argentine beto vwandaka na bantu kulutila 400,000 na lukutakanu mosi; ntangu na manima ya ntangu beto me monaka bantu yango. Mpe mu ke bambuka moyo na manima ya midi ya ntete, beto vwandaka na bantu kulutila 400,000 yina vwandaka yimba yawu na Espagnol, mpe mu vwandaka na bayankaka yina vwandaka niunguta yawu, mpe na nganda ya vwandaka na bantu kulutila 300,000. Beto lombaka na bantu yina vwandaka na kati na kuwandaka swi na ntangu bantu yina vwandaka na nganda vwandaka niunguka bampova ya nkunga yango. Mpe na mbala mosi, na yina bawu vwandaka yimba yawu, kima mosi fulusaka moyo ya munu. Mu me zabaka ntete ve na luzingu ya munu luzayikisu ya Klisto na kati ya munu tii kuna munu waka makelele ya bantu 300,000 na nganda ke na kuyimbila yawu “Mu zola Yandi” na nganda . . .? . . .na suka yayi ya kele na basoda ya lukumu ya Ntinu ya nkembo, mpe ba ke na kuyimbila. Nani ba ke zolaka? Nani beno ke zolaka?]]

Yinga.

[Klisto, Klisto kati ya munu.]

Yinga.

[Kivuvu ya nkembo. Beno kanga meso ya beno, beno telemisa maboko ya beno, mpe beno yimba yawu diaka, bantu nionso.]

Yinga Mfumu.

[Mu zola Yandi, mu zola Yandi,
 [Samu Yandi zolaka munu ntete,
 [Mpe futaka mpulusu ya munu]
 [Na yinti ya Calvaire.]

[Kana beno zola Yandi na suka yayi, beno yambana na babakala tatu to yiya luswaswanu; mpe bakento beno sala mutindu mosi; mpe beno tuba, “Mu zola Mfumu Yesu Klisto.” Ya kele mbote; beno tula maboko ya beno . . .—Mu.]

³³⁷ Kana mu lenda mona yayi kusalama bisika nionso na yinza, mu ke tuba, “Mfumu, bika kisadi ya Nge kukwenda na ngemba!”



BUNZAMBI ME TENDUKA KNG61-0425B
(The Godhead Explained)

Nsangu yayi ya Mpangi William Marrion Branham, kulongamaka na Kingelesi, na suka ya Kilumbu ya zole, ya kilumbu ya 25 ya Ngonda ya yiya, na mvula 1961, na Holiday Inn na Chicago, Illinois, U.S.A., yina bakamaka na bande manietiki mpe basisamaka na muvimba nionso na buku na Kingelesi. Lubangulu yayi na Kikongo basisamaka na buku mpe ba kabulaka yawu na Voice Of God Recordings.

KIKONGO-KITUBA

©2020 VGR, ALL RIGHTS RESERVED

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org

Luzabusu samu na kubasisa mikanda

Muswa nionso kele ya yandi. Muntu nionso lenda kubasisa buku yayi na masini ya yandi ya yinzo samu na yandi mosi, to kukabula yawu ya mpamba, mutindu kisadilu samu na kumwangisa Nsangu ya mbote ya Yesu Klisto. Ba lenda tekisa buku yayi ve, kubasisa yawu na lutangu ya kulutila mingi, kutula yawu na site internet, kubumbisa yawu na kibumbulu ya bansangu, kubangula yawu na bandinga yankaka, to kulomba mbongo kukondwa muswa yina me sonama na Voice Of God Recordings®.

Na yina me tadila bansangu ya kulutila mingi to samu na yina me tadila bisadulu, beno sonikila:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org